

○ M O N I T A

E T

P R Æ C E P T A

C H R I S T I A N A .

EDITIO ALTERA.

In Usum Regiæ Scholæ Etonensis.

LONDINI, apud C. DILLY.

ETONÆ, apud M. POTE,

MDCCXCVII.

~~Excat 25397.97~~
~~Excat 3747.97~~

1854. Dec. 7.

The Gift of

Mrs Sarah Campbell

the sister of the

Rev. Prof. John S. Popkin D.D.

" Quicumque non exceperit regnum Dei,
" tanquam puerulus, nequaquam introibit in
" illud."

*Hæc Christus: Eamque simplicitatem, quam
in recipiendis Christi documentis habere debent
discipuli animi; in iisdem hic explicandis secutus
est libelli hujusce auctor; qui rem, in se gravissi-
mam, cum planissimam quoque efficere conaretur,
non subtiliter, neque ornate eam tractare, sed
pueris potius prodesse, quam doctis placere,
voluit.*

MDCCXVII

I. De Officiis Christiani Hominis erga Deum.

CAP. I. De Deo in juventute cogitandum.

II. De Precibus.

III. De Gratiarum Actione.

IV. De Pœnitentiâ.

V. De Die Dominico.

VI. De Cœnâ Dominicâ.

VII. De Jurejurando.

VIII. De Blasphemiâ.

II. De Officiis Christiani Hominis erga Homines.

CAP. IX. De Justitiâ.

X. De Charitate, sive universâ Benevolentiâ.

XI. De

XI. De Humilitate.

XII. De Officio Filiorum erga Parentes.

XIII. De Homicidio.

XIV. De Mendacijs.

III. De Officijs Christiani Hominis erga
Seipsum.

CAP. XV. De subjugandis Corporis Libidi-
nibus.

XVI. De Temperantia in Cibo et Potu.

MONITA ET PRÆCEPTA CHRISTIANA.

De Officiis Christiani Hominis erga Deum.

CAPUT I.

De Deo in juventute cogitandum.

- I. *Primitiæ vitæ Deo dicandæ.* II. *Lex Judæica de sacerdotibus.* III. *Adolescentia ad pietatem exsuscitandam maxime accommodata, utpote non pravâ consuetudine vitiatâ.* IV. *Animi juvenum ad discendum proniores sunt.* V. *Ad veritatem admittendam aptiores.* VI. *Ex adolescentia bene transactâ oritur felix senectus.* VII. *Objectio.* VIII. *Cui respondeatur.* IX. *Altera objectio.* X. *Cui respondeatur.* XI. *Tertia objectio.* XII. *Cui respondeatur.*

I. **U**T * gregis, † frugumque primitias Deo quotannis dare lege Mosaicâ Israëlitis præscriptum est; ita nos juventutem nostram, vitæ scilicet primitias, ei dicare æquum est, à quo vivimus, spiramus,

* Exod. xiii. 2, 12. † Exod. xxii. 29. xxiii. 19.

2. *De Officiis Christiani Hominis erga Deum.*

mus, sumus. Quorsum adolescentiam viribus, formâ, ingenio ad res maximas percipiendum, memoriâ ad retinendum, instruxit Deus, nisi ut dotibus hisce uteremur in ipso laudando? quorsum pertineat ei vitæ fæces offerre, scelere atque criminibus exhaustæ? quasi ille turpissimis cupiditatibus, et nocentissimis deliciis posthabendus esset; quasi nullæ victimæ illius ad aram ducendæ, nisi cæcæ, claudæ, et mutilæ.

II. Jussit lex Judaica, ut veniret * Levita viginti et quinque annos natus ad militiam ministerii; ut verò quinquaginta annos natus non amplius ministraret; ibi enim vires, et corporis, et animi deflorescere. Nonne æquum est, ut vis membrorum ei sit dicata, qui formavit ea, et composuit? utque mentis dotes, florentes adhuc et integræ, in eo contemplando exercerentur, qui iis dedit et intelligere, et sapere?

III. Quid, quod adolescentia ad virtutem pietatemque exsuscitandam maximè accommodata est? Non enim eo tempore malâ consuetudine tantum vitiatur animus, quantum per longam annorum seriem scelere et nequitia contaminatus. Invisa primò vitia tandem fiunt perquam amabilia; † *donec iniquitas ut aqua imbibatur*: adeò ut quò diutius peccatum

* Num. viii, 24.

† Job. xv. 16.

aliquod tibi indulgeris, eò sit deponere difficilius. *An autem suam exulat Æthiops, aut maculas pardus? tum profecto etiam vps vna facere possitis, ad male faciendum vultu.* An adeò leve atque ludicrum videtur Dei gratia, ut quodvis tempus ad eam adipiscendam sufficiat? Nonne metuenda sunt ea, quibus te impediatur peccandi inveterata consuetudo? Nonne vimem quàm arborem flectere facilius est, et obstare malis moribus, quàm eos evellere? Multa nos docent, summum in omnes consuetudinis esse imperium. Cùmque pravæ consuetudini se diu addixerint homines, vereor ut quoquo modo extirpetur peccandi mos; qui præter quod radices in pectoribus nostris altius agit, nos illecebris suis ad se trahit, et à pietate absterret. Constat igitur juvenes innocuos et nondum corruptos facilius se ad Deum recipere, quàm senes, vitiis quasi squalidos, et nequitia penitus obritos.

VI. Animi etiam juvenum ad discendum proniores sunt. Præclare à *†* philosopho quodam dictum est, *νεκρὸν λατρεύειν, καὶ γινώσκειν νεκρῶν ταύτο ἐστίν.* Est enim in adolescentibus modestia quedam decens, unde dociles fiunt, quæ quidem in maturioribus rarè invenitur:

* Jerem. xlii. 23.

† Diog. Laert.

4. *De Officiis Christiani Hominis. erga Deum.*

vel quia jam se scire putent omnia; vel quia turpe credant, haberi rudes earum rerum, quas nescire dedecus est. Hinc discipulis suis dicit Christus, * *nisi animo essent submissi, tanquam parvuli, in caeleste regnum non inturos*: nisi scilicet imitarentur parvulorum modestiam, animique humilitatem, ita ut ex ignorantiae suae conscientia dociliores fierent.

V. Utque ad discendum promiores, ita ad veritatem admittendam aptiores sunt mentes adolescentium, utpote quas praëdicatae diu opiniones spinis et sentibus non obduxerint. Animus non diu vacuus jacebit; et si veri notitia non citò compleatur, pravis erroribus imbuetur. Mentem tempore et criminibus indurata[m] flectere longè difficilior est, quàm molli atque cæreo ingenio quaecunque pietatis et religionis signa inducere; aded ut rectè dixerit propheta, † *Quem docebit scientiam, et cui proponet intelligendum documentum? Depulsis à lacte, avulsis ab uberibus.* Molli enim et tener est juvenum animus, et ita flexibilis, ut sequatur, quocunque torqueas. Cum audierit aliquid de morte, de judicio, de Christi vitâ et cruciatibus, ut palluit, erubuit, pudoremque cum mœstitiâ commistum testatus est adolescens; dum duro ore, at-

* S. Matt. xviii. 13.

† Isa. xxviii. 9.

que vultu immoto sedet scelere diu exercitatus, quasi spei, timori, gaudio, luctui, misericordiae nequaquam penetrabilis!

VI. Ex adolescentia bene transacta oritur felix atque honorata senectus; et contra vita sceleribus exhausta tum gravissima est, cum ad finem appropinquat. Quam miserum est senem, * *cujus ossa implentur peccatis adolescentiae*, dies praeteritos respicere! Quid si etiam † *undecimā horā* resipiscat, Deusque etiam tum veniam oranti non recuset, quo tamen horrore pectus suum contemplabitur? quibus malis se circummeinctum videbit? quo pondere animus gravabitur? An verisimile est Deum illum, quem tamdiu delictis suis delassavit, ei ultro misericordiam porrecturum, quin gustet, quā amarum sit peccare? An mirum est, si Deus ille, quem vocantem toties contempsit, cujus à consiliis et monitionibus se toties avertit, saepe eum fracto abjectoque animo precari patiatur prius, quā precanti clementer respondeat?

VII. 'At grave est,' inquires, 'ut vitae delicias, omnesque illico voluptates repudicemus? Quid vires nobis profunt, si rerum earum, quas fert adolescentia, affinibus esse non licet? Undique nobis suppeditat

* Job xx. 11.

† S. Matt. xx. 5.

'vita,

6 De Officiis Christiani Hominis erga Deum.

• vita, quæ sensibus lenocinentur: jam sapi-
• unt deliciæ; jam gustandis gaudiis sensus
• subtilissimi sunt; quorsum igitur nobis hoc
• consilium, senibus, quorum languent, et
• sopiti sunt affectus, accommodatius?

VIII. An verò illæ voluptates, quarum
sapor exquisitissimus, ipsis consentientibus, cum
adoleſcentiâ marceſcit simul, adeò ut iis sæpe
superſtites ſitis, cum illis comparandæ sunt,
quibus nec modus est, nec terminus? an vita,
peccatis reſerta, quâ paucas horas fruimur,
• *queque amaritudo in fine fit*, anteferenda est
animæ tranquillitati, gaudii immortalis præ-
ſciæ? An denique operæ pretium est, ut brevium
deliciarum prodigi emptores, potiùs vos sup-
pliciis æternis obſiciatis, quàm evagantes ani-
morum affectus cõhibeatis, et reprimatis?

IX. At non libet ab aliis ita diſſentire,
• ut quâ ætate cæteri se voluptatibus ingurgi-
• tant, omnibus probantibus, à ſocietate, coe-
• tuque lætantium, nos diſjungamus. Cui-
• que ætati ſua ſunt ſtudia: juventæ volup-
• tes, ſenectuti pœnitentia: tum proſectò
• decebit parçè et religioſè vivere, cum ſensus
• noſtros ætas hebetaverit, et ea repudiare
• docuerit, quibus ampliùs potiri non licebit.

2 Sam. ii. 26.

X. Quid

X. Quid verò? num in perniciem ruere cum pluribus optabilius, quam cum paucis eam evitare? num virtuti, et felicitati, vitium, miseriamque, anteponetis, quia *via quæ ad vitam ducit angusta et parum calcata, quæ ad exitium lata et trita est?* Et quia sunt qui potius indulgent delictis adolescentium, quam ea culpant, aut reprimere conantur, (partim quia putant esse eos animi instabilis, et plurimum voluptatibus deditos; partim quia homines proveciore ætate, immotis oculis sua respicientes, facile aliorum peccatis ignoscunt;) idcircone iis peccare licitum est? Num ratio, num sacræ scripturæ juveni concedunt, ut impunè sit nequam? an ullo vitæ tempore peccare fas est? annon semper fugiendum est scelus, tam adolescentiâ quam senectâ? An optimum vitæ tempus criminibus conteres, quasi Deus eo sit indignus?

XI. 'At Deus, cujus maxima est clementia, nos in vineam suam etiam ultimâ horâ recipiet; et spes est adhuc feliciter morituros, qui pessimè vixerint.'

XII. Absit, ut infinitam Dei misericordiam cohibere, aut circumscribere enitamur! At nolite profectò vitæ melioris spem in ultimam

8 *De Officiis Christiani Hominis erga Deum.*

huiusce horam differre. Qui enim scitis quàm citò Deus vos ad iudicium vocet? Multi vobis, nec robore, nec ingenio, nec re, nec genere inferiores, in ipso adolescentiæ flore succisi sunt. Multos peccatis suis obrutos ingurgitavit orcus; multis ad poenitentiam ne hora quidè data est. Nec rarò accidit, eos, qui Deum deseruerunt et contempserunt, à Deo desertos et contemptos vivere.

C A P U T II.

De Precibus.

I. Si Deus sit, orandus est. II. Orantem peccata confiteri necesse est. III, IV, V, VI. Qualia à Deo sint oranda. VII. Orandum enixè. VIII. Quoties orandum sit. IX. Quo modo. X. Phariseus et Publicanus. XI, XII. Cavendum ne orantes animis aberremus. XIII. Preces sunt aut privatæ, aut publicæ. XIV, XV, XVI. Mala quæ à contemptu publici cultus orta sunt. XVII. Christianos præcipuè oportet congregatos precari. XVIII. Et in Dei templo se decenter gerere.

I. **Q**UI Deum esse concedit, is orandum eum, colendumque concedat oportet. Qui enim nos fecit, cujus de benignitate

benignitate atque potentia, pendet res nostra, salus, vita, huic profecto supplicandum est, ut bona omnia nobis largiatur, mala omnia a nobis avertat; sed, præsertim, ut his omnibus ignoscat, quibus aut scientes, aut inscientes in eum peccavimus.

II. Qui, ut delictis suis ignoscatur, Deum orat, ea ut confiteatur, necesse est. Nec hoc solum, sed pudorem etiam, cum mærore commissum, animo suo fovere debet; ubi hoc non fit, lingua, non corde, peccasse se fateatur.

III. Quicquid aut animis, aut corporibus nostris sit utile, id, cum a Deo unice pendeat, a Deo rogandum est. Primum itaque peccatis veniam petenda est, non nostro, sed Christi nomine, cujus ad Deum nobis conciliandum effusus est sanguis. Orandum insuper Sancti Spiritus auxilium, omnesque illæ virtutes, sine quibus Christianis verè fieri non licet, charitas, animi humilitas, justitia, castimonia, fides.

IV. A Deo aliquid petiturus, tecum semper reputes, cui peccato præ aliis deditus sis; si hoc ex animo amovere possis, id demum erit seriò triumphare. Si superbus sis, animi humilitatem; si libidinosus, castimoniam petas: cæterasque virtutes, prout tibi his opus sit.

V. Orandum etiam pro corporibus nostris; non pro divitiis, aut voluptatibus his quæ in
B malum

10 De Officiis Christiani Hominiſ erga Deum.

malum ducant, ſed pro firmâ valetudine præcipue, proque iis quæ ad vitam neceſſaria ſunt; quo modo nobis præcepit Chriſtus,
* *Panem noſtrum quotidianum da nobis hodie.*

VI. Nec ut bona ſolum impertiat, ſed ut mala à nobis avertat, Deo ſupplicandum eſt: quæ mala vel ad peccata ſpectant, vel ad ſupplicium. Oremus itaque, ut ab omni ſcelere tutos nos præſtet, nec in tentationem induci ſinat: oremus etiam, ſi quid pravi fecerimus, ne nos gravius caſtiget; præcipue autem ne favorem ſuum à nobis penitus amoveat, et æternæ poenæ damnatos relinquat.

VII. Cum de animâ tuâ agitur, præcibus enixe Deum adeas, nec ſi non ſtatim votis annuerit, etiam atque etiam precari deſinas. In te deſcende; mentem tuam concute; ibi ſcrutare, quænam ſit cauſa, cur à Deo indonatus abeas; vide ſi non ipſe tuis votis obſtes. Rogas fortasſe, ut aliquod tibi peccatum expugnare concedat, ipſe interea ignavus, atque iners; imò et ultro ac lubenter deditus. Si hoc ſit, parum valebunt preces tuæ; id enim à Deo precaris, quod ipſe, ut tibi det, non ſinit.

VIII. Roget aliquis, quoties ſit opus, ut Deo ſe precibus commendet: id proſectò ex

* S. Matt. vi. 11.

loco,

loco, tempore, ætate, vitæ conditione, pender. A necessariis negotiis plus aliis, quàm aliis, vacat. Ne verò quis id temporis voluptati, nedum sceleri concedat, quod precibus negat; nec prius aliquis ad somnum se vespere recipiat, quàm, ut à nocturnis periculis liberetur, Deum oraverit; nec diurnum opus mane suscipiat, donec lucis auctorem coheruerit. Annon eum dementem atque insanum putes, qui, quicquid vellet, habere illico posset, si modò id ab amico rogaret, nec rogaret tamen? Eodem furore et ipse corripere, si non Deum, omnium amicissimum, frequenter accedas, quicquid tibi prosit, ab eo accepturus.

IX. Nec verò tam refert *quoties*, quàm *quo modo* preceris. Cavendum itaque est, ne quid rogemus, quod rogare nefas; ut divitias, aut potentiam ad libidines pravas explendum, aut damnum dedecusve eorum, quibus irascimur. Fidendum est etiam, si rogamus eo more quo decet, Deum id nobis donaturum quod petimus. Orandum est denique animo submisso atque humili, non nostris ipsorum, quo modo Pharisæus ille, sed Christi meritis freti.

X. * *Ibant duo homines simul ad templum oratum, hic Pharisæus, ille Publicanus. Stetit Pharisæus seorsum, et ita dixit: 'Gratias tibi ago, Deus, quòd non sim, sicut alii homines, iniusti, rapaces, mæchi, aut etiam iste Publicanus. Sep-*

* S. Luc. xviii. 10.

12 De Officiis Christiani Homini erga Deum.

'tem diebus bis jejuno: decimo quæcunque possideo.'
Publicanus interea procul stans, ne oculos quidem
ausus ad cælum tollere, pectus percussit, dixitque,
'Deus, miserere mei peccatoris.' Dico tibi, inquit
Iesus, ad domum suam descendisse hunc justificatum
potius illo: quicunque enim se *evebit*, deprimetur;
quique se deprimat, is *evebetur*.

XI. Animo etiam maximè attento opus est:
quòd si linguâ solummodò præscripta quædam
verba effundimus, mente in terras defixâ, hoc
profectò est, Dei majestatem contemnere, * *e-*
umque labiis honorare, cum cor ab eo procul absit.
Et quàm immanis est stultitia, cum de cor-
poribus animisque nostris agitur, futes ali-
quas levesque nugas persequi, Dei illius,
quem alloquimur, penitus immemores?

XII. Hoc ne fiat, nobiscum etiam atque e-
tiam cogitemus, quantus sit ille, quem adi-
mus; nec audeamus, eo præsentè, aliis rebus,
aut hominibus vacare. Putemus quid sit id,
quod rogamus; quo accepto, felices, negato,
miseri erimus in æternum. Cordi igitur tuo
invigila, et si quid alieni ibi locum habeat, id
honestâ indignatione rejice.

XIII. Preces Deo offerimus, aut à cæteris
seclusi, nullo vidente, aut publicè, inter reliquos
Christianos: quorum utrumque maximè ne-
cessarium est. Si enim in templo tantum, non

in domo quoque, Deum adimus, non ab eo, sed à laudibus hominum, præmium nobis expectatur. * *Introito igitur in conclave tuum, et clauso ostio tuo precare Patrem tuum in occulto, et Pater tuus, qui te aspicit in occulto, reddet tibi palam.*

XIV. Quòd si clàm solùm, nocte et tenebris defensi, ut Jesum Nicodemus, ita nos Deum adiremus, nec quispiam auderet palam eum affari, ex animis hominum, cùm non publico auxilio inniteretur, citò excideret timor, et cultus Dei. Si inter sylvas delitescat religio, dum in sole atque pulvere spatiat sce- lus, parum argumentis opus est, quæ probent, exinde citò oriturum contemptum Dei, mores- que perditos ac dissolutos. Timor istius Dei, quem nec dolus potest fallere, nec vis flectere, ad bene beatèque vivendum, apprimè necessa- rius est; et uniuscujusque est officium timo- rem hunc non solùm in animo suo fovere, sed in aliis excitare; quod quidem publicis preci- bus fieri optimè videtur; nec secretò Deum adibunt ii, qui publicè non colunt.

XV. Cultu Dei amoto, quid potentiores comprimet, nisi dedecoris, quid humiliores, nisi supplicii timor? Parum autem hæc vale- bunt; quem enim vitæ suæ tædet, ei in alte- rius est imperium. Quid enim prohibet, quo minus ei, quem odit, necem intenet? Æ-

* S. Matt. vi. 6.

terni

14 *De Officiis Christiani Hominis erga Deum.*

terni supplicii timor? at id non timet. Turpissime igitur et protractæ mortis? hanc vero facillimè vitet, mortemque sibi ultrò consciscat. Quid igitur est aliud, ex animis hominum religionem tollere, nisi in felices, in divites, in bonos, genus perditissimum, miseros et desperantes immittere? Malè profectò nobis esset in hac vitâ, si de aliâ nihil innotesceret.

XVI. Sæpenumerò à plurimis observatum est, legitimæ omnis auctoritatis contemptum, notam esse huic sæculo præ alijs inustam: filios parentibus, servos magistris, discipulos præceptoribus suis, nec obedire nec obsequi. Quis verò hoc miretur, cùm sint, qui vix, aut ne vix quidem, *illius* auctoritatem agnoscant, unde in parentes, in magistros, in præceptores, auctoritas omnis derivatur? Ex malo patriciorum exemplo oritur plebis nequitia: neque enim celari potest, eos à publico Dei cultu maximè se abstrahere, quorum studio ad propagandam religionem maximè est opus; quique Deo, pro omnibus hujus vitæ, quibus disfluunt, deliciis, gratias debent, eas nequaquam solvere. Hinc à principibus derivata mala, in patriam, et in populum fluxere.

XVII. At verò nos Christianos publicis precibus uti, et congregatos precari, jussit is, cujus de nomine nos appellamus. Nec in toto terrarum orbe exemplum extat Christianæ alicujus

alicujus ecclesiæ, quin in eâ administrantur sacramenta, Deusque publicè atque apertè colatur. Imò inter acerbissimi cruciatûs timores perpetuos, ad precandum coherunt Christiani; quique, ut vitam servaret, à publico Dei cultu aberat, eo nomine indignus putabatur.

XVIII. Restat ut pauca dicam, quibus vos moneam, quàm audax sit et improbum eo in templo, quod ipsi Deo dicatum est, inter publicas Christianorum preces, indecori aliquid committere. Si coram principe, aut rege aliquo esset, quis est è vobis, qui non gereret humilem se, et submissum? Deone igitur præsentè id facere audebitis, quod coram homine non audetis? Eum profectò toto animo, toto corde adorare ipsi debetis; at saltem ne in alienas preces, qui forsitan pro vobis ipsis Deum precantur, irruatis. Ridere, colloqui, reverentiâ, aut in gestu, aut in oculis carere, præsertim libros ad delectandum animum, ad horam fallendam, et à cultu religioso, prorsus alienos, fortasse etiam immodestos atque indecoros perlegere, quid est nisi Deum contemnere, sanctasque caeremonias irridere? Cavete, cavete, obsecro vos atque obtestor, per amorem illum, quo animas vestras amatis, ne quid vobis indignum committatis: Christianos esse vos recordamini. Frequens

16 *De Officiis Christiani Hominis erga Deum.*

quens vobis est occasio Deo vos commendandi: ne frequentibus istis occasionibus abutimini; nec quod in salutem vestram datum est in perniciem convertentes, nocentiores vos faciat.

C A P. III.

De Gratiarum Actione.

- I. *Gratie Deo agenda.* II. *Quia nos creavit.* III, IV. *Quia conservat.* V. *Quia à peccatis nostris redemit.* VI. *Inter omnia officia nullum hoc illustrius.* VII. *Nullum jucundius.* VIII. *Nec quod nos magis elevat.* IX. *Ex hoc officio oritur animi humilitas.* X. *Et adulationis contemptus.*

I. **U**T Deo pro speratis beneficiis supplicare, ita pro acceptis gratias agere oportet. Quis enim aliquid petit, quin ei, à quo impetravit, se gratum præbeat?

II. Quicquid sumus, quicquid possidemus, quascunque aut hujusce vitæ delicias, aut melioris spes fovemus, à Deo hæc omnia procedunt. Primùm itaque uno ore, unoque animo, eum laudamus, qui è nihilo nos
† formavit,

formavit, contemptoque pulveri divinæ auræ particulam afflavit. Nos, qui cogitamus, qui sapimus, qui superbimus, id fuimus, quod in triviis lutum est. Nobis spiritum, nobis sensum, nobis animum ad altissima evehendum, dedit Deus. Ille artus nostros è brutâ materiâ compositos immortalī mente instruxit, cœlumque nos sperare iussit; eum itaque adeamus, quanta acceperimus, confitentes; eique, qui nos formavit, quod possumus, referamus, non beneficia, sed laudem atque honorem.

III. Utque nos formavit, ita formatos quotidie servat, rerum ille terrestrium, cœlestiumque Creator. Parum esset nobis vitam dedisse, nisi vitæ isti invigilasset. Per imbellem infantiam, per lubricam juventutem, per infirmam senectam, idem, qui nos fecit, et servat, Deus; hinc ab innumeris istis, quibus vita humana laborat, malis liberamur; *nec nocturna nobis nocet sagitta, nec quæ interdum grassatur pestilentia.*

IV. Nec laudandus est solum propter hæc, quæ omnibus pariter largitur Deus, sed si quid boni tibi præcipuè acciderit, gratiæ à te præcipuè debentur: si è dolore scilicet, è morbo, præsertim è peccato aliquo salvus evaseris.

• Psal. xci. 6.

C

V. Quæ

18 *De Officiis Christiani Hominis erga Deum.*

V. Quæ verò sunt ea bona, quæ ad hanc vitam spectant, si cum iis comparentur, quibus felicitas æterna, atque immortalis nobis parta est? Si laudandus sit Deus, quod formaverit nos, & formatos servet; quantæ ei gratiæ debentur, qui à suppliciis meritis nos redemerit, Filiumque suum unigenitum morti acerbissimæ subjecerit, ne nos in æternum miseri essemus.

VI. Ut solem, lunam, sidera, immotis oculis aspicimus, quia semper lucent; ita quotidiana à Deo accepta beneficia faciunt, ut eorum obliviscamur. O miseri, atque ingrati homines, qui eò minus Deum laudatis, quod plura ab eo acceperitis!

VII. Inter omnia hominis officia, gratiarum actione nihil illustrius, nihil præstantius. Postquam mundum formaverat Deus, omnesque ejus partes, pondere, numero, mensurâ, sibi invicem aptas, et congruentes concinnaverat, defuit adhuc, qui pulchritudinem, qui ordinem, qui delicias immensæ istius machinæ intelligeret, quique à contemplando dono, ad auctorem ejus se erigens, debitis eum laudibus extolleret. Aliæ quidem partes religiosi cultûs, *confiteri* scilicet, et *orare*, quorum unum è peccatis, alterum ex egestate oritur, non hominis erant innocen-

tis,

tis, et nondum lapsi: quòd si incontaminatus adhuc vixisset, bona hujus vitæ percepisset, proque iis Deum tantum laudasset. Sed criminibus imbuto, et ad inopiam redacto, necessariae sunt preces; cum in paradiso primum, nihil præter laudes exauditum est, nec postea in cœlis exaudietur.

VIII. Quid quod *jucundissimum* hoc officium est, ex animi hilaritate deductum. * *Laudate Dominum, quia bonum est psallere Deo nostro, imò amœnum et decens est laudatio.* Precari, et peccata fateri, indigorum, et nocentium est, † *Si quis dolet, precetur; at si quis hilaris est, in hymnos erumpat. Saturantur enim puerum animi quasi adipe, et pinguedine, cum labiis canoris Deum laudant.*

IX. Animi etiam facultates elevat, atque incendit, Deum laudare; et à rebus contemptis ad eum erigit, qui naturam atque excellentiam ipsius, quod possunt, investigantibus, quasi detegere se, et explicare videtur. Hominem homini longè præstare, quis est qui non intelligit? Unde autem oritur ferè hæc præstantia? quia hic scilicet de viliibus, et nullius pretii rebus, cogitationes suas exercet; dum illum juvat ad sublimiora, et diviniore

* Psal. cxlvii. 1.

† Psal. lxiii. 5.

20 *De Officiis Christiani Hominis erga Deum.*

mentem evehere. Si igitur, quod præstantius sit id, ad quod contemplandum se erigit animus, eò fit elatior, et, ut ita dicam, divinior; quàm cæteris illum præcedere oportebit, qui quasi cum Deo quotidie colloquium init, eumque laudare, atque adorare, nunquam desinit?

X. Ex hoc officio oritur indignatio gravissima, si quid de Dei nomine parum reverenter, aut indecorè dictum sit. Oritur etiam animi humilitas, et de nostrâ imbecillitate rectum iudicium.

XI. At verò maximum iis est commodum, qui Deum laudare soliti sunt, quòd hominibus adulari semper metuant. Omnes eloquii delicie, omnes sermonis lepores, in principibus laudandis exhauriuntur; et quicumque ab iis aliquid expectant, in cælum eos evehunt; unde aliorum omnium, et sæpissime etiam ipsorum, quos laudant, contemptum in se devocant. Qui vero homines adorant, Deum eos non adorare, haud injustè dicas; qui profectò omnium sunt stultissimi: turpiter enim eos colunt, qui nec volunt, nec possunt, ipsis benefacere, eo relicto, cui omnia debent, cuique adhuc, quæ quidem bona dicantur, omnia debitori sunt.

De Pœnitentiâ.

21

C A P. IV.

De Pœnitentiâ.

- I. *Pœnitentia necessaria ad Christi præcepta excipienda.* II. *Virtus verè Christiana.* III. *Quotidie pœnitendum.* IV. *Et statis temporibus.* V. *Præcipuè cùm morbis aut calamitate laboramus.* VI. *Non ad mortis tempus differenda pœnitentia.* VII. *Quæ quotidie sit difficilior.* VIII. *Orandus est Deus ut nos ad pœnitentiam impellat.* IX. *Mali principis obstandum.* X. *ad finem.* *Historia Davidis.*

I. **C**UM ad parandos hominum animos, quò faciliùs præcepta à Christo tradenda haurirent, in terras venit celebris ille Messiae præcursor, *Pœnitentiam agite, inquit, et resipiscite; appropinquat enim regnum calorum.* Novit profectò plurimis delictis, omnes, qui audierunt, laborasse; nec potuisse novi fœderis participes fieri, donec ea pœnitentiâ eluissent.

II. Hæc virtus, si quæ alia, verè Christiana est. Peccatis rejectis, ad Deum nos convertere, mala omnia ex animo evellere, eaque exsequi officia, quæ nobis ipse præscripsit, id demum

22 *De Officiis Christiani Hominis erga Deum.*

demum est, resipiscere; quod quidem adeò necessarium est, ut sine eo nulla veniæ, aut impunitatis, sit spes; dixit enim Christus, *Ni- si resipiscatis, omnes peribitis* *.

III. Quòd si quis roget, Quoties agenda sit pœnitentia? Quoties pecces, respondeo? quod vereor ne fiat quotidie. Imitemur itaque exemplum clarissimi istius imperatoris Romani, qui nunquam ad dormiendum se priùs recepit, quàm quicquid fecerat, quicquid dixerat, quicquid cogitaverat eo die, secum expendisset.

IV. Ut verò, qui rationes suas diurnas computant, aliquod sibi tempus præscriptum habent, quo eas ad examen exactius revocent; sic nos oportet, non modo diei cuiusque delicta, eo finito, percurrere, sed quædam etiam tempora seponere, quibus omnia, quæcunque per totum vitæ cursum peccavimus, ita confiteamur, ut eorum nos verè pœniteat.

V. Sed præter stata hæc tempora, sunt et quædam huic officio maximè accommodata, qualia sunt, si quis morbo, aut gravi aliquâ calamitate laboret. Si quis nuncius à cœlo missus, ne quid contra officium tuum faceres, te moneret, annon ei auscultares? an potius monentem contemneres? quod tamen facis, quoties à miseriâ aliquâ oppressus, ad virtutem et pœnitentiam non te revocas.

* S. Luc. xiii. 3.

VI. Est et aliud pœnitentiæ tempus; moriendi scilicet hora; quæ quidem ad renovandum id officium, quàm ad incipiendum, accommodatior est. Quanta clementia est, animi felicitatem in eo reponere, in quo vix aliquid minimi reponeres? Rogare enim velim, Si morienti tibi ea dolere propositum sit, quæ in Deum sanus commisisti, unde scias tibi etiam hoc facere licere? Nonne horæ momento insperantes, inopinantes, è vitâ eripimur? Quod aliis accidit, id tibi ne accidat, cavere potes? At verò si morbus aliquis, mortis et minister et nuncius, eam tibi instare præmoneat; fieri tamen potest, sicut alii ægroti, ut te fallas, et licet sensim moriaris, non tamen ad moriendum paratus sis. Quod si hoc non fiet, teque propero pede ad sepulchrum accedere planè videbis; unde tamen scire licet tibi ad pœnitentiam paratum animum fore; quæ quidem non nobis insperantibus semper inservit, sed à Dei Optimi Maximi gratiâ procedit.

VIII. Quid, quod peccandi consuetudo, quò diutius pectore inveteravit, eò difficilior erit expulsu. Si quidem relipiscere, nihil aliud esset, quàm à peccatis abstinere, tum profectò ei aptissimum esset moriendi tempus, cum peccandi potestas non jam relinquitur.

Cum

24 *De Officiis Christiani Hominis erga Deum.*

Cùm verò, et odium delictorum, et Dei amorem, in se continet poenitentia; an verisimile est eum, qui vitium semper amavit, quique virtutem aversatus est, adeò horæ momento mutari, ut id, quod amavit, vitium oderit; eamque, quam odit, virtutem amplecteretur?

VIII. Optandum profectò esset, eam nobis à Deo immortali mentem fuisse datam, ut à peccatis penitè abstineremus. Cùm verò ea naturæ humanæ est imbecillitas, ut etiam optimi sæpissimè peccent, oremus eum ut ad maturam poenitentiam nos incendat; cujus gradus sunt, primùm confiteri delicta, deinde dolere, postremò ab iis converti.

IX. Cavendum autem, ne scelus scelere cumulantes, onus poenitentiae faciamus gravissimum. Id ne fiat, mali principiis obstandum. Qui semel unam culpam commisit, ad aliam committendam est proclivior. Utque ære alieno laborans delicias sibi pretiosiores indulget, et in eas se angustias precipitat, unde evadere nequit; ita qui semel virtutis detrimentum fecit, paulatim audacior, ea demum apertâ luce perpetrat, quæ antea etiam in tenebris meditari reformidavit. Qui se cupere aliena patitur, nec cupiditati isti obflare conatur, is furti erit et latrocinii affinis: quique videndâ foeminâ oculos suos quotidie pascit,

pascit, aut obscenos sermones deblaterat, mirum ne quondam adulterio se contamineat. Nemo fuit repente turpissimus; ad extremum sceleris paulatim itur; at verò progredienti planior et faciliior fit via; tandemque eo impetu impelleris, ut omnibus utens viribus, omni conamine, vix possis consistere.

X. Quo modo scelus sceleris sit parens, utque nefas cumulatissimum vera poenitentia abolere possit, docet clarissimus iste Israelitarum Rex, cujus historiam breviter recensere non alienum erit.

XI. * *Surrexit è lecto Jeshides, vespere jam adventante, et in fastigio domus suae obambulabat. Exinde feminam pulcherrimam se lavantem conspexit. Nonne, inquit, haec Bathsheba est, Uriæ uxor? Agite, dicite ut huc veniat. Venit itaque, filiumque ex eo concepit.*

XII. En magnum exemplum sceleris, atque incontinentiae! Uxorem alienam vitiavit ille, cujus erat omnium civium suorum possessiones tutas, atque inviolatas praestare. Quid autem? an Uriæ postea uxorem suam tradidit? Audite, quaeso, à nequitia ad nequitiam quam facilis sit via. Urian è praelio arcessivit, ei que literas dedit Joabo imperatori

* 2 Sam. xi. 2.

D committendas,

26 *De Officiis Christiani Hominis erga Deum.*

committendas, quibus mandatum est, ut Urian in fronte exercitus, ubi acerrime dimicaretur, ita collocaret, ut vix heri posset, cum mortem obiret. En igitur scelus perfectissimum! Civi fidissimo, et fortissimo militi, qui pro se vitæ periculum quotidie imbat, non modo uxorem, sed vitam eripuit. Adulterio fœdatus homicidium non reformidavit.

XIII. * *Veni postea ad eum Nathan, dixitque, Erant in eadem civitate duo homines, hic dives, ille pauper. Divoili multa erant armenta, multi greges: pauperi nihil, quod suum vocare posset, præter unicam agnam, quam ipse emerat, suæque manu nutrierat. Cum pueris accrevit simul, ipse ex mensa edebat, ipse ex poculo bibebat, ipse in gremio decumbebat, eratque ei pro filia. Ecce autem viator ad divitis domum venit, qui suis gregibus, suisque armentis parens, unicam agnam suam pauperi eripuit, cibumque hospiti apposuit.*

XIV. *Vebementer iratus David, Quin hoc, inquit, fecit, is ceris morietur; et pauperi quadruplum insuper restituet, quia animo erat misericordi.*

XV. Quas autem eum cogitationes in animo fovisse, quâ solitudine distractum fuisse putemus, cum prophetam audiit dicentem,

* 2 Sam. xii. 1.

“ Tu

Te ille es. Ita inquit Dominus Deus Israëlitarum, *Ego te regem oleo unxi, teque Sauli & manibus liberavi. Tibi domini tui aedes, tibi in gremium uxores ejus, tibi domum Israël, et Jebudæ tradidi. Cur igitur Dei præcepta contempsisti, eoque vidente, malum hoc fecisti? Uriæ uxorem suam abstulisti, ipsumque gladio Ammonitarum necuisti.*

XVI. Quo audito David cohorrui; cineribus se involvit, fracto ex animo suspiria effudit, et gravissimo mœrore oppressus, *In Deum, inquit, peccavi. Dixit ei Natban, Quoniam eorum, quæ fecisti, te verè pœnitet, Deus à te peccata tua amovit, non morieris.*

CAP. V.

De Die Dominico.

I. Officiorum duo genera. II. Observandum Sabbatum in memoriam Dei Creatoris. III. A Judeis observatum in memoriam liberationis ex Aegypto. IV. Utque tempus ad quiescendum mercenariis, et pectori esset. V. Quo modo Sabbatum observare Christiani sit officium. VI. Dies à Christianis mutatus. VII, VIII. Quid facere eo die deceat.

I. **Q**Uicquid jussit Deus, id hominibus faciendum est; et, utcunque per se nobis necessarium non videatur, eo mandante,

28 *De Officiis Christiani Hominis erga Deum.*

fit officium. Hinc officiorum duo sunt genera, eorum scilicet, quorum vim atque efficaciam per nos ipsi intelligimus, qualia sunt, iustitia, misericordia, Deum esse credere, eumque adorare; et eorum, quæ idcirco sunt observanda, quia ille, cujus summum est in suos imperium, ea observari voluit; qualia sunt festa, cæremoniæ, et alia quæ ex arbitrio suo ipse nobis proposuit.

II. Inter hæc primum locum sibi vindicat Sabbati observatio; eo enim præcipuè die, et contemplari et commemorare jubemur rerum omnium auctorem. * *Sex enim diebus fecit Deus et cælum, et terram, et maria, quæque in iis sunt omnia.* Parum refert, quantum temporis elapsum fuerit, dum è chao exurgere pulcherrima hæc omnia mandaret. Ei enim ram facile fuisset horæ momento hæc fecisse, quàm sex diebus, apud quem † *unus dies est ut mille anni, et mille anni ut unus dies.* Cùmque dicimus septimo die *requievisse Deum*, non inde significamus labore aliquo opus hoc Deum confecisse, sed solummodo tum terminatum, et ad finem perductum fuisse.

III. Israëlitis in solitudine errantibus hoc præceptum deinceps datum est; cujus præter eam, quam modò diximus, alia erat causa.

* Exod. xx. 11.

† 2 Pet. iii. 8.

* *Reminiscere te servum fuisse in Ægypto, teque Dominum Deum tuum inde extulisse, manu potenti, et extento brachio; Deus itaque, Deus tuus, jussit te sabbatum observare.* Hinc apud Hebræos † qui vel ligna collegit in Sabbato, occidebatur.

IV. Est et alia causa hujus præcepti, ut mercenariis, servis, imò et ipsis bobus, tempus ad quiescendum detur. ‡ *Septimo die quiesces, ut bos et asinus tuus quiescant, et filius ancillæ tuæ, atque bospes reficiatur.* Ubi obiter notandum est, Deum, § *sine cujus jussu ne passer quidem ad terram cadit, pecori etiam et gregibus invigilare; scilicet ut doceat homines miris esse, et mansueti ingenii, justumque oportere, vitam etiam jumentis sui curare.*

V. His præmissis, non difficile erit intelligere, quo modo hoc Christiani sit officium. Quod Judæis in eremo mandatum est, nempe ut quiete, atque otio, suam à jugo Ægyptiaco liberationem agnoscerent, ei genti unicæ præscriptum erat: hoc igitur || S. Paulus inter eas leges enumerat, quæ aliis populis minimè necessariæ essent, de cibis scilicet, et potu, de noviluniis, diebusque festis. Unde Christus de Sabbato id dicit, quod de plurimis aliis

* Deut. v. 15. † Num. xv. 32. ‡ Exod. xxiii. 12.

§ Matt. x. 29.

|| Coloss. ii. 16.

30 *De Officiis Christiani Hominis erga Deum.*

præceptis dici non posset, * *filium hominis dominum esse etiam Sabbati.* Quod verò ad publicum Dei cultum, qui nobis hæc omnia fecit, quod ad nos, aliosque ea docendos, quæ malum est nescire, quod ad quietem mercenariis, servis, pecorique concedendam attinet, hoc profectò et æternum et immutabile, æquè omnibus est officium: quique perpetuâ virtutis exercitatione, per omnem vitæ cursum ea faciunt, quæ Deo gratissima sunt, quotidianum hi Sabbatum observare verè dicantur.

VI. A Judæis septimus dies, à nobis, primus colitur. Ut enim illi diem præ aliis honoratum habebant, quo à gravi servitute post longam annorum seriem liberati erant; ita nos eum præcipuè veneramus, quo à mortuis resurrexit is, qui à pessima servitute animos nostros redemit, nosque in æternam libertatem vindicavit; unde diem hunc S. Joannes † *diem Dominicum vocat.*

VII. Hoc præcipuè die templum Deo dicatum adire oportet, peccata nostra confiteri, eumque suppliciter orare, ut bona omnia precantibus ea, aut non precantibus, largiatur, atque mala etiam à precantibus avertat: cum cæteris Christianis

* Marc. ii. 28.

† Apocalyp. i. 10.

congregatis

congregatis religionem nostram publicè profiteri; et in cœtu credentium sociatis precibus Christum appellare: eos insuper audire, quibus interpretari sacras scripturas commissum est: domi etiam, de iis, quæ ad animas nostras maxime pertinent, meditari decet; aut legere aliquid, quo mentis affectus emendentur, et à terrestribus ad cœlestia evehantur. Nec colloquium inire, de Dei benignitate, de Christi morte, de iudicio, de vitâ æternâ, aliisque quæ in animos imperium habent, labor erit irritus; sic enim, rebus divinis affuisti, inferiora omnia despiciere paulatim ediscemus, et ea metuerimus facere, de quibus vix loqui audemus.

VIII. Non tamen, ut quidam putant, mores severos, et austeram Sabbati observationem exposcit Deus. Quicquid culpâ caret, id quovis die licitum est; nec ab hominibus nos abstrahere oportet, et non vacare amicitiae officii. At verò rixas, aut iurgia ciere, sermones indecoros, viroque et Christiano indignos inire, à publico colentium cœtu sine licitâ causâ semper abesse, aut ea officia in hunc diem transferre, quæ aliis fieri oportet, hæc omnia officio nostro repugnant; utque brevi complectar, quicquid factum profanis diebus scelus, id Sabbato factum scelestius est.

32 De Officiis Christiani Hominis erga Deum.

C A P. VI.

De Cœnâ Dominicâ.

- I. Hortatio ad celebrandam cenam Dominicam.
- II. Institutum perpetuum esse.
- III. Officium esse omnium Christianorum huic mensæ frequenter adesse.
- VI. Ex hoc officio pendere omnia evangelii beneficia.
- V. Quod negligere animi est ingratisissimi.
- VI. Deterrentur homines ab hac mensâ, ne eam adeant indignè.
- VII. Amovetur isti timores.
- VIII. Tantum periculum est ex neglecto hoc officio, quantum ex indignè cenam Dominicam accedendo.
- IX. Si scelere inquinatum à mensâ hac abesse oportet, tum etiam oportet eum omnem Dei cultum projicere.
- X. Respondetur iis qui sacramenti hujus participes esse metuunt, ne, quæ postea committant peccata, veniâ careant.
- XI. Quo more necesse sit animos expurgare.
- XII. Quid Corinthiis imputârit Apostolus.
- XIII. Parendum Christo, qui dixit, 'Hoc agite mei memores.'
- XIV. Deo gratiæ agendæ quandocunque nobis oblata est occasio hanc mensam adeundi.
- XV. Digni sumus irâ Dei, si oblata beneficia repudiamus.

I. **D**E cœnâ Dominicâ dicturus, ad eam celebrandam vos exsuscitare enitar, vobis quàm brevissime proponendo,

1. Institutum hoc perpetuum esse; id enim vult S. Paulus, ubi dicit, * *Quotiescunque ederitis hunc panem, et hoc poculum biberitis, mortem Domini enuntiatis, usque dum redierit.*

2. Officium esse omnium Christianorum huic cœnæ frequentissimè adesse, quod hoc verbo innuit Apostolus, *Quotiescunque.*

3. Eos amovendo timores, qui in mentibus etiam piorum sæpissimè locum habent, eosque a sanctissimâ hâc mensâ deterrent; qui oriuntur ferè ex his verbis, † *Qui edit et bibit indignè, damnationem sibi ipsi edit et bibit, non discernens corpus Domini.*

4. Hortando vos ad animos vestros concutiendos, ut eam cœnam digniores accedatis: † *Explore autem unusquisque seipsum, et ita de pane illo edat, et de poculo illo bibat.*

II. 1. Perpetuum esse institutum ex his verbis apparet, *Quotiescunque ederitis, &c.* quæ legas licet, quasi imperantia, sive præcipientia, enunciate mortem, &c. Hujus sacramenti originem, quoque modo ipse non ab Apostolis tantum, sed à Deo id institutum accepisset, S. Paulus paulò antè dixerat, com. 23. 24. 25. Ex his itaque verbis pendet institutum, † *Hoc facite mei memores:* quibus ex verbis utrùm hoc semel an sæpiùs esset faciendum, utrùm à

* 1 Cor. xi. 26. † Ibid. 29. † Ibid. 28. † Ibid. 24.

34 *De Officiis Christiani Hominis erga Deum.*

discipulis solummodò, dum vita illis suppetet, an ab omnibus in omnia sæcula, quotquot Christianorum nomine se dignos crederent, non satis liquet. Quod verò affirmat S. Paulus, nobis hiquidò ostendit, institutum hoc non ad Apostolos tantum, aut ad unum sæculum, sed ad omnes Christianos spectare, *Quotiescunque enim ederitis hunc panem, et biberitis hoc poculum, enunciatis mortem Domini, usque dum venerit; dum venerit, inquam, majestate et gloriâ circumcinctus, ad homines judicandos.* Hoc itaque instituto mortem Christi enunciamus, nec cessabit id officium, donec sæculorum finis advenerit.

III. 2. Officium esse omnium Christianorum huic mensæ quàm frequentissimè adesse, ex eo patet, quòd ille, cujus nos discipulos profitemur, et perdere et servare potens, ita nos facere jussit. Ut verò aliquis, qui Christianum se vocat, legem Christi nullo modo ambiguum contemnat et negligat, quid est nisi legis ipsum latorem contemnere et negligere? Non minus his, quàm Judæis, Jesus dicit, *Quid me Domine, Domine, vocatis, nec facitis quæ jubeam?* Scientibus quæ facere debeant, nec facientibus tamen, quis amplius veniæ sit locus?

IV. Est et de re nostrâ cœnam hanc Domini-
cam quàm frequenter adire. Quæcunque ex

novi

novo fœdere beneficia nobis innotescunt, ea omnia ex hoc sacramento in nos fluere et derivari speramus; qualia sunt, peccatorum venia, Sancti Spiritûs auxilium, (quod rectè facientes hortetur, delinquentes admoneat, sub infortuniis laborantes consoletur,) vitæque æternæ præmia amplissima. Adeo ut, sacramentum hoc negligentes, negligimus etiam et utilitatem, et felicitatem nostram, quasi indignos Dei beneficiis nos judicamus, optimoque ad paranda ista beneficia instrumento nos privamus. Si itaque officii nostri ratio parum valet, valeat tamen felicitatis spes, valeat supplicii timor.

V. Quid, quòd institutum hoc non sedulò et diligenter observare, animi est ingratisimi. Vitam suam pro nobis depositurus hoc Christus præcepit. Amici morientis jussa contemnere, inter homines religio est; hoc autem nobis imperavit humani generis amicus fidissimus, jamjam moriturus, pro nobis se mactandum jamjam oblaturus, cruciatus gravissimos pro nobis subiturus, seque pessimæ morti, ut à doloribus acerbissimis necis æternæ nos liberaret, traditurus. Et hoc facere, eo imperante, negabimus, qui pro nobis hæc omnia fecit? Quid si magnum aliquod, et difficillimum præcepisset, nonne id facere nos oportuisset? quanto magis oportet, cùm solummodò dixit,

36 *De Officiis Christiani Hominis erga Deum.*

Hoc facite mei memores? Cùm tantùm jussit, ut in memoriam amoris sui erga nos, et earum rerum quas pro nobis passus est, quam ipse paravit cœnam animo gratissimo adeamus, eumque gustemus cibum, quò accepto, nunquam iterum esuriamus?

VI. Nec profectò difficile fore, credo, homines ad negotium hoc exfuscitare, nisi deterreantur, aut periculo mensam istam indignè adeundi, aut necessitate animos suos antè parandi, et expurgandi.

VII. 3. Eos itaque amovere timores aggrediamur, qui in animis hominum sæpissimè locum habent, eosque à sanctissimâ hâc mensâ deterrent. Putant enim plurimi, tantum esse periculum ex hanc mensam indignè adeundo, ut tutius sit eam non omnino accedere.

VIII. At verò ex neglecto hoc officio tantum oritur periculi, quantum ex cœnam Dominicam indignè accedendo. Qui nuptiales epulas adire nō fuerunt, æquè culpandi erant, ac ille, qui eas adivit, nuptiali togâ non indutus. Nemo, ne scelestissimus quidem, dapibus iis adesse potest, quas Jesus instruxit, quin ad bona aliqua consilia suscitetur, moresque suos emendare quovis modo conetur; et, utcunque peccandi consuetudine retentus atque impeditus sit, si tamen harum epularum frequenter sit particeps, ita vires et potentiam
Ebriorum

libidinum confringet Deus, ut tandem, divino cibo perpastus, ad bonam frugem redeat, eamque felicitatem sentiat, quæ, nisi ex puro, et in-contaminato animo, oriri non potest. Qui verò officium hoc negligunt, quid est, quod ab immanitate sceleris eos absterreat? nihil profectò, nisi legum humanarum timor; quas fallere licet, et tamen scelestissimis esse.

IX. Quòd si homines tutius esse credant, à cœnâ Dominicâ penitùs abesse, ne eam indignè accedant, tum profectò tutius est scelerare, et nequitia contaminatum, omnem Dei cultum projicere, neque amplius precari, nec sacras scripturas aut legere, aut audire. Est enim, ex horum omnium abusu, periculum non leve. * *Preces scelesti*, illius scilicet quem sceleris sui non pœnitet, *odio sunt Deo*; monetque Christus, † *Cavete quomodo audiat*. An verò aliquis inde dicet, tutius esse hominem sceleratum nec Deum precari, nec sacras scripturas legere, et audire, ne, si ita faciat, gravius in se supplicium devocet? et tamen verum est, eum, qui indignè hæc facit, æquè pœnæ esse obnoxium, ac qui cœnam Dominicam indignè accedit. Qui ullo cultu religioso abutitur, miserrima est illius conditio; qui verò omnem penitùs contemnit, de eo desperandum est; id enim abjecit, quo unico remedium inventurus esset. Qui edit et bibit

* Prov. xv. 8.

† S. Luc. viii. 18.

intemperanter, in discrimen adducit et salutem et vitam suam; qui verò nec edit nec bibit omnino, haud dubium est, quid de isto futurum sit.

X. Sunt, qui sacramenti hujus participes esse nolunt, ne, quæ postea commiserint peccata, veniâ caritura sint. Fateor equidem, gravissimum esse peccare, cœlesti isto cibo repletum; sed abesse à sanctâ illâ mensâ, delictis nostris remedium nequiquam præbebit. Adeamus eam potius animo tristi, et vultu dejecto; hoc enim solum à culpis nos liberabit, Deique favorem nobis conciliabit. Quòd si postea indignum aliquod committamus, ad pœnitendum protinus accingamur; * *habemus enim advocatum apud Patrem Jesum Christum, peccatorum nostrorum piaculum*; qui, fracto corpore, et effuso sanguine nobis idcirco exhibetur, ut benefactorum ab eo acceptorum nunquam immemores simus. An credibile est primos Christianos, quibus hoc poculum gustare tam frequenter contigit, eo semel accepto, nunquam iterum peccâsse? at non ideo veniâ carebant, quia, ad cœnam Domini vocati, nunquam abfuerunt.

XI. 4. Jam verò videamus, quo more necesse sit animos nostros expurgare, ut ad sacram hanc mensam digniores accedamus. *Exploret unusquisque seipsum, et ita de pane illo*

* 1 Joan. ii. 1.

edat, et de poculo illo bibat. Erat inter Christianos veteres consuetudo, epulas eas, quibus amorem mutuum sibi invicem omnes promittebant, seriò et temperanter celebrare; iisque finitis, cœnam Dominicam instruere. Inter Corinthios autem, his dapibus divites solummodò accubuerunt, nec pauperibus relictus est locus; unde factum est, ut sacramensam indecorè adirent, hi esurientes, illi cibo nimio perpasti, vinoque ebrii. Hoc est, quod Apostolus vocat, *non discernere corpus Domini*; id est, inter cœnam Dominicam, et turbulentum convivium, nullum discrimen facere; unde dicit, *Eos edentes et bibentes indignè suum iudicium edere et bibere*; (hoc enim *ἁγίας* significat, quod *damnationem* interpretes vocant:) quòd enim *ἁγίας* non æternam damnationem, sed ad eam evitandam, pœnam aliquam leviozem significat, ex eo, quod sequitur, manifestò pater: dicit enim S. Paulus, * *Ob hanc causam multi inter vos ægri et infirmi sunt, et plurimi dormiunt: ob hanc scilicet intempestivam ebrietatem, varios morbos vobis immisit Deus, unde multi è vobis mortui sunt.*

XII. Hoc erat quod Corinthiis imputavit Apostolus; eos scilicet, non, ut decuit, sed turbidè et temulenter sacras epulas accessisse. *Exploret igitur, inquit, unusquisque seipsum;*

* 1 Cor. xi, 30.

40 *De Officiis Christiani Hominis erga Deum.*

quæ quidem verba paulò latiùs extendi voluit; ut ii scilicet, qui corporis et sanguinis Christi participes esse vellent, vitas moresque suos inspicerent, et, si quid pravi esset, id corrigerent; præcipuè, ut qui veniam suis delictis sperarent, in se peccantibus ignoscerent; ut omnes inimicitias, omnem ultionis cupiditatem deponerent; eumque universum amorem erga omnes exercerent, quem etiam in mediis cruciatibus erga omnes Christus exercuit.

XIII. Si quidem seriò, et ex animo credimus, ab Jesu jam morituro institutum esse hoc convivium, sui erga nos amoris monumentum, tum profectò nequit fieri, quin id læti, et mente gratissimâ celebremus. Quoties hæc verba legimus, *Hoc facite mei memores*, et consideramus simul, quid ipse, qui hoc dixit, nobis fecerit, animis nostris altè repositum sit hoc mandatum; præsertim cùm idem dixerit, * *Majorem amorem habet nemo, quàm ut quis vitam pro amicis deponat; vos estis mei amici, si ea faciatis, quæ jubeo*. Mirus profectò est iste amor, et memoriâ æternâ fovendus: et hoc vicissim à nobis postulat, ut hâc cœnâ frequenter pasti, ea recordemur merita, quæ nobis peperit. Quòd si hoc facere negligimus, sumus omnium ingratiissimi.

XIV. Quotiescunque de benefactis hisce,

• 3. Joan. xv. 13.

sub

sub figurâ panis, et vini adumbratis, cogitamus, aded non ea refugere, ut Deo Optimo Maximo grâtiâs offerre debeamus, quandoque ea hauriendi occasio nobis oblata sit. Tanti muneris compotes, eo frui non audebimus? Exclamare potius libeat cum rege sanctissimo, * *Ecquando tabernacula tua accedam, O, Jehova exercituum? desiderio afficitur anima mea veniendi ad atria tua*—Quod si rerum æqui æstimatores simus, gravissimum esse eo munere privari, putemus, quo frequenter, imò et libenter, nos ipsi privamus.

XV. Romanos sacerdotes incusamus quotidie, in justam indignationem prorumpentes, quod dimidium cœnæ hujus divinæ cæteris dare negaverint, iisque abstulerint *poculum benedictionis, poculum salutis*. Nos tamen nullius momenti esse ducimus, si eo multos menses, imò multos annos, ultrò careamus. Si nulla exinde beneficia oriantur, quid eos culpamus, qui poculum suis denegant? si plurima, quid ea contempnimus? nonne meriti sumus, animis nostris maciem ut immitrat Deus, eosque perpetuâ solitudine tabescere faciat, si, cum mensam epulis optimis confertam, ipse instruxerit, panemque vitæ nobis apposuerit, non illico veniamus, eoque læti atque hilares pascamur?

* Psalm. lxxxiv. 1.

C A P. VII.

De Jurejurando.

I. *Dicendum de iis, quæ vitanda sunt.* II. *Præceptum de jurejurando Christus extendit.* III. *Furisjurandi tria sunt genera.* IV. *De licitis.* V. VI. *De falsis.* VII. *Non jurandum in vetita, aut contraria.* VIII. *Jurantes Deum offendunt.* IX. *Qui hoc vetuit.* X. *De levis.* XI. *Quæ non excusantur consuetudine.* XII. *Jurare soliti perjurio sunt proximi.* XIII. *Nihil est quod homines ad hoc delictum alliciat.*

I. **H** Actenus de iis rebus dixi, quas persequi Christiani hominis officium est. Pauca quædam subjungere libet, de iis, quas vitare necesse est; et primum, de jurejurando.

II. Monebantur Hebræi, ne perjuri se affines præstarent. Christus autem hoc præceptum aded extendit, ut quicumque juret omnino, nefario scelere se polluat. * *Audistis dictum fuisse veteribus, Non pejerabis, sed reddes Domino, quæ tu juraveris: ego verò dico vobis, Ne jurate omnino; neque per cælum, quia solum est Dei; neque per terram, quia subsellium*

* S. Matt. v. 33. &c.

est pedum ejus; neque per Hierosolymam, quia urbs est magni regis. Neque per caput tuum jures, quia non potes unum capillum album aut nigrum facere. Esto autem sermo vester, etiam, etiam; non, non: quod autem supra hac redundet, à malo est.

III. Jurisjurandi tria sunt genera; aut enim vera et licita sunt, aut falsa, aut levia.

IV. Licet cuiquam jurare, nec in Deum peccare, ubi, coram iudice, citatus, de gravi aliquâ re testimonium suum profert. Cum enim de fortunis, de famâ, de capite alterius agitur, ea naturæ humanæ est imbecillitas, ut affirmanti cuiquam nemo satis credat; jurare itaque, et Deum invocare oportet, id, quod dicit, verum esse. Hinc testimonio fides oritur; nec in publicis judiciis aliter fieri potest. Qui verò hâc in re perjurum se præstat, ex omnium coetu expellitur, atque exterminatur; ut qui Deum ultrò contempserit, fidemque inter homines tollere conatus fuerit. Neque hoc solum, sed humanis etiam legibus, poena illi gravissima constituta est.

V. Falsò jurandi duo sunt genera; aut enim affirmamus aliquid, aut promittimus. Si dicam juratus, id factum esse, quod non factum esse sciam, perjurus sim: imò, si jurejurando affirmem, id verum esse, quod verum sit necne nesciam, utcumque verum sit, perjuri pœnam

in me devocem; temerè enim juranti non facile ignoscitur, etiamsi accadat, id verum esse, quod juraverit.

VI. Sed, præter has jurandi formulas, quibus aliquid affirmatur, sunt et aliæ, quibus aliquid promittitur. Promittitur aliquid, aut Deo, aut hominibus. Si Deo, votum est, cujus reus, nequaquam te excusatum habeas, nisi id penitus compleveris: si hominibus, falsum sit, aut eo tempore, quo juraveris, aut postea. Eo ipso tempore, quo juraveris, falsum est, si non tibi certum sit id facere, quod facturum promiseris; aut si diversè interpretaris, ac scias eum interpretari, cui promiseris. Utcunque tamen statueris id facere, quod promissisti, quo tempore te id facturum juraveris, si tamen postea non facias, perjurio nequaquam absolveris.

VII. Cum igitur necesse est, ut, qui se facturum aliquid juraverit, id faciat, cavendum est, ne nobismet insidias ultro struamus, id nos facturos jurando, quod legibus et humanis & divinis repugnat. Quod si jurejurando affirmes, te aliquem occisurum; aut homicida sis oportet, aut perjurus: adeo ut in utramvis partem pecces necesse sit. Cavendum insuper, ne quis in duos contraria, et inter se repugnancia, juret: quod si juratus affirmet, se omnes fortunas suas testimonio lega-
turum

curum amico cuidam, et postea iratus, se nihil ei legaturum juret, utcumque accidat, in eas se angustias detrufit, ut, nisi perjurus, evadere non possit. Quid igitur faciat? pœniteat eum illius, quod temerè, vel injustè, vel iratè, se facturum juraverit; et id faciat, quod sapientiae, quod pietati, quod justitiae consentaneum est.

VIII. In omni jurejurando, Deum invocamus, qui testetur, id esse verum, quod enunciavimus; quod si falsum sit, quàm contumeliâ, quo opprobrio Deum afficimus? Quid enim est aliud, nisi significare, aut nescire eum, quæ loquimur vera sint, necne; aut quod pejus est, mendacio eum ultro favere? quorum alterum scientiam ejus infinitam tollit, alterum veritatem.

IX. At verò, si cui adhuc dubium videatur, quàm flagitiosum sit hoc delictum, audiat Deum ipsum dicentem, *Se non eum infentem habiturum, qui nomen suum frustra invocaverit;* nec in ullum aliud peccatum Dei ira, et indignatio gravius denunciatur.

X. Est et aliud genus jurandi, leviter scilicet et inconsulto, unde Dei honori maximè nocetur. Quàm scelestum, et nefarium est, illius nomen, per quem vivimus, à quo judi-

46 De Officiis Christiani Hominis erga Deum.

cium futurum speramus, levibus et ludicris sermonibus, sæpe etiam profanis, et impuris inserere: * *Ne omnino jurate: neque per eælum; est enim Dei solium: neque per terram; est enim pedem ejus subsellium.* Non jurare licet, etiam per ea, quæ fecerit Deus; nedum per ipsum, qui fecit. Hoc profectò delictum, nescio quâ consuetudine, inter homines inveteravit, unde latius latiusque disseminatur. At verò recordemur, parum nobis profuturum ad Christi tribunal adstantibus dicere, cum cæteris nos peccasse.

XI. Quicquid homines depravato hoc sæculo credant, utcunque sermone levissimo Deum invocare non reformident, aliosque eum ita invocantes surdis auribus audiant, utpote qui nihil præter solitum faciant, sciant tamen, hoc, de quo loquor, peccato, nec gravius esse, nec ad Dei iram concitandam aptius. Christi enim præcepto non solum obviàm imus, sed de Deo nos judicium indignissimum facere liquidò demonstramus. In omni jurejurando, ut superiùs dixi, Deum appellamus, qui testetur, quod juravimus, id verum esse; ille autem eâ majestate est, ut adire cum, nisi in rebus maximi momenti, ubi aut

* S. Matt. v. 34.

de ipsius dignitate, aut æternâ hominum felicitate agatur, nefas sit. Longè verò aliter se res habet, cùm in conviviis, in viis, inter sermones futilissimos, jurejurando nos obstringimus; ubi ea jurare multi non metuant, quæ sapientem etiã loqui puderet.

XII. Quid, quodd inter colloquendum levissima jurejurando affirmare solitus, ad perjurium rectâ tendit viâ, nec ab eo longè distare videtur? An jusjurandum religiosè servabit, in diem, in horam jurare assuetus? An ille veniã est dignus, qui clamat, inscientem se et imprudentem perjurum factum? Animos suos scrutentur ii, qui hoc crimine laborat, et invenient, sæpe ea se juratos effudisse, quæ falsa esse ipsi sciant.

XIII. Est ad alia delicta, quod homines inducat, et alliciat. Hic lucri cupiditati inserviens, ille effrænis animi libidinibus, scelere se polluit, ut aliquid inde sibi consecetur. Ex hâc autem culpâ nec utilitas ulla, nec jucunditas exoritur. Si sperant homines, eò plûs sibi credi, quò perseverantiùs aliquid affirmant jurati, spe suâ quàm plurimùm excidunt; nullius enim testimonio minor adhibetur fides, quàm Deum temerè invocantis. Nec injuriã; qui enim rerum omnium auctorem ultrò lacessere non dubitat, quid

48 *De Officiis Christiani Hominis erga Deum.*

quid est, cur is mentiri dubitet? imò quò promptius levissima jurejurando confirmat, eò magis suspicionem movet, esse aliquod scelus, quod tegere & obumbrare velit. Nec delictum hoc, quia quotidianum est, idcirco ponatur inter ea, quibus facile ignoscatur; quò enim minùs ad id committendum animi affectibus homines accenduntur, eò gravius, et scelestius est.

C A P. VIII.

De Blasphemiâ.

- I. *Quid sit blasphemia.* II. *Scelus esse gravissimum.* III. *Sacras scripturas irridere nefas.* IV. *Delictum hoc apparet, 1. in cogitatione. 2. in verbis.*

I. **S**I Deum aut falsò, aut temerè invocare, sit gravissimum, id quod modò ostendi; quid de eo putandum est, qui nomen illius, qui attributa, qui promissa, qui minas irridet, omnemque arripit occasionem, etiam inter levissimos et impurissimos sermones, palam profitendi, se nec timere eum, nec revereri? Hoc est profectò quod blasphemiam appellamus, cùm quis vocibus contumeliosis in rerum omnium auctorem opprobria effundit.

II. At verò, quo ore Deum adibit is, et peccatis

peccatis suis veniam implorabit, qui de eo omnia indigna et fecerit, et dixerit? quo vultu ad iudicium venientem Jesum sustinebit, cuius merita, cuius supplicia, cuius mortem pro ludibrio, et ridiculo habuerit? Quod si non credant homines, Christum in terras venisse, et pro delictis suis mortem obiisse, contemnere tamen eum, et conviciis laceessere desinant: nequeunt enim probare falsa esse, quæ de eo credimus Christiani; et si vera sint, quam gravissimum eorum est scelus.

III. Sunt, quibus præcipua quædam voluptas oriri videtur, si quid in sacris scripturis inveniant, quod aliis deridendum propinent. Parum habent non iis credere, nisi et ridiculo, et contemptu excipiant. Si in Judaicâ historiâ mirum quid, et insolens legant, in effusissimos risus prorumpunt, eorumque stultitiam indignantes admirantur, qui fabellis malè contextis fidem adhibeant. Si dicas, Judæos à cæteris hominibus in eum finem segregatos, ne veri Dei nomen et cultus obsolesceret, multaue inter eos miranda Jehovam fecisse, quo promissis suis lætijs confiderent, ex historiâ istâ protinus aliquod excerpunt, quod quidem naturali rerum ordini repugnat, et pro argumentis risu refellunt. Veri autem index esse ridiculum non potest. Sincero animo, nec præjudiciis vitiato, utrùm à Deo proces-

processerint ea, de quibus agitur, utrum incorrupta historicorum fide ad hunc usque diem servantur, explorent; si ita se res habeat, desinant miranda Dei facta risu, et contumeliis excipere, ne serius denique eos premiteat, cum perniciem in se devocarint.

IV. Aut verbis Dei majestatem lædimus, aut cognatis. Cognatis eam lædimus, cum de Deo indignum aliquid putamus, ut si eum non clementem, non iustum, non omnipotentem esse credamus. Verbis autem, cum hæc, quæ indigne cogitamus, temere effundimus, et risu insuper, opprobriis, contumeliis cumulamur. Sæpe autem accidit, ut plurimi, delicti hujus gravissimi verbis non insontes, animis ab eo alieni sint; et inter convivia, sermones futes effundant, quibus ipsi non credant, ut festivi scilicet, et hilares habeantur. Hoc verò quam plurimum cavete; nec æternam felicitatem in unius diei discrimen detis. Ne Deum vestrum lacestatis, ea dicendo, ex quibus nec utilitas, nec voluptas proveniat; nec acerbam multorum annorum poenitentiam brevis horæ suavitatis lætitiæ ematis.

De Officiis Christiani Hominis erga Homines.

C A P. IX.

De Justitia.

I. *Quodnam sit justitiæ munus.* II. *Justitiæ repugnant, 1. Furti et latrocinia.* III. *2. Vis et dolus.* IV. *3. Alterius famæ nocere.* V. *Summum jus summam esse injuriam.* VI. *Alteri faciendum quod tibi vis fieri.*

I. **J**ustitiæ munus est *, ut jus suum cuique reddatur; ut ne cui quis noceat, nisi injuria lacessitus. Hoc, ex ipsa lege naturæ deductum, in omnibus philosophorum scriptis, tum veterum tum novorum, verbis disertissimis exprimitur. Huic apud Judæos † *lex rationis* præcipue consuluit. Quid verò? nonne hoc

* Justitia est, constans et perpetua voluntas jus suum cuique tribuendi. Justin. Instit. Lib. I. Tit. I.

Juris præcepta sunt hæc: *honesta vivere; alteri non laedere, suum cuique tribuere.* Ibid. Sect. 3.

Vid. Cic. de Officiis, Lib. I. Sect. 7.

† Numb. xxiv. 17, &c.

52 De Officiis Christiani Hom. erga Homines.

officium confirmavit, imò et auxit, religionis nostræ fundator? Ille non tantùm à perpetrata, sed ab excogitata injustitiâ suos cavere iussit. Non itaque satis est, ut jus suum cuique reddas, utque ab illo, quod alterius est, manus abstineas, sed ne optanda quidem sunt ea quæ alii contigerunt. Et quod naturæ legibus præscriptum est, *ut ne cui quis noceat, nisi injuriâ laceffit*; iussit Christus etiam injuriâ laceffitos quicquid ad ultionem spectet ex animis projicere, et alteri nullo modo vicissim nocere. * *Si quis, inquit, dextram tibi genam percutiat, obverte ei et sinistram.*

II. 1. Huic virtuti primùm adversatur, quicumque aut palam vi, aut clam dolo, in alienas possessiones invadit; quorum unum furti nomine, alterum latrocinii appellatur. Horum delictorum consciis in omni civitate supplicia parantur, ut à probis et honestis tutius vivatur.

III. 2. Alterum injustitiæ genus est, ubi aut vis corpori alicujus, aut saluti dolus intenditur. De homicidio dicturus posterius, non eam vim volo, aut eos dolos, qui vitæ perniciem struant, sed qui detrimentum cujuscunque modi alteri inferant, qualia sunt verbera, plagæ, vulnera. His quoque de-

* S. Matt. v. 39.

x

licitis

hæc à magistratibus idoneæ poenæ constituuntur; quas quicumque vitavit, ne se Dei judicia vitaturum speret, cujus oculi secretissima perspiciunt, cujus dextera ad puniendum parata est.

IV. 3. Nec à bonis tantum, et corporibus alienis abstinendum, sed præcipue cavendum est, ne cui per te famæ, atque existimationis fiat detrimentum. Qui rem suam imminutam luget, sæpe iterum ex angustiis evadit, et satis ad se, suosque sustentandos, labore, atque diligentia, corradit. Qui corpori violentiam aliquam illatam queritur, remedium aliquod vulneris ferè invenit: qui verò existimationis pessimum facit naufragium, mirum si unquam emergat: omnes illico adversantur; omnes fugiunt atque contemnunt; et adeo prout est genus humanum ad id credendum, quod alteri noceat, ut sæpissime, indicta causa, condemnatur à præjudicatis censoribus vir summæ probitatis, pietatisque. Quid, quod integro, verèque incorrupto, et divitiis, et salute, imò et ipsa vitâ charior est hominum de se existimatio; nec immeritò dixit sapientissimus ille rerum humanarum æstimator, * *pretiosius esse unguento bonum nomen*. Illum itaque omnium injustissimum rectè dicamus, qui famam alterius lædere conatur, idque ei iniquè eri-

* Eccl. vii. 1.

54 *De Officiis Christiani Hom. erga Homines.*

pere, quod meritò omnium charissimum est.

V. Ipsa justitia fines suos habet, nec ultra modum exerceri debet. Legibus quidem publicis (quæ ad coërcendos atque reprimendos aliquos, quò cæteri tutiores forent, natæ atque inventæ sunt) multa constituta sunt supplicia, quæ interdum mitigare, nonnunquam penitus prætermittere, non humanum modò, sed etiam civile est. Quædam enim incidunt aliquando, quæ commissi cujusvis culpam aut debilitant, aut etiam tollunt; verbisque licet quis legi obnoxius sit, re non item. Hic justiciam non reprimere injustissimum esset; aded verum est id quod affirmabant etiam veteres Pagani, “* *Summum jus aliquando summam esse injuriam.*”

VI. Nos verò præceptum melius, et ad nostros usus accommodatius, à Christo habemus†, *Quod tibi fieri non vis, id alteri ne feceris.* Quicquid igitur agamus, quicquid dicamus, quicquid excogitemus, quascunque res, quæcunque negotia, cum aliis geramus, hoc animo infixum, atque altè repositum sit. Facturusne sum, quod rei alicujus detrimentum faciat, vel quod dolorem minimum, aut

* Cic. de Officiis, lib. I. cap. 11.

† S. Matt. xi. 12.

mentis, aut corporis, ei excitet? At prius quam faciam, mecum reputem, quid si quis mihi idem minitetur? feramne patienter? annon potius læsum me, et contemptum querar?—Insidiasne alicui paraturus sum, unde in mala improvise inopinans incidat? At paulisper mecum considerem, quid si ipse in insidias easdem cadam?—An dicturus sum aliquid, quo famæ alienæ damnum inferatur? At prius quam dicam, hæc mecum agitem; Falsumne est id quod locuturus sum? at quo vultu, quo ore audebo id palam enunciare, unde alterius existimationi noceatur, quod fictum, falsumque esse sciam? Dubiumne? an igitur voces ambiguas in populum spargam, quæ falsæ veræne æquè mihi peccati noxam inferunt, cum falsæ veræne sint, nesciam? At verum est? quid ergo? Egone hominem, iisdem, quibus ipse, laborantem infirmitatibus, paucorum flagitiorum compertum, quorum mox forsitan pœniteat, deridendum atque contemnendum cæteris propinabo, meaque inhumanitate adigam ad desperationem, atque insaniam? Quid si ipse olim aliquid simile fecerim? an mea peccata proferri, atque exponi velim? Nonne ipse dixit, qui pro me, proque omnibus mortuus est, *Quod tibi fieri non vis, id alteri ne feceris?*

C A P. X.

De Charitate, sive universa Benevolentia.

- I. Charitas res primaria in Christiana religione.
- II. Quid sit charitas.
- III. 1. Nihil mali de aliis putare.
- IV. Qui alium culpatur, se contemnit.
- V. 2. Discordantes conciliare.
- VI. 3. Aliorum rebus prosperis gaudere.
- VII. Sed non semper.
- VIII. 4. Adversis indolare.
- IX. 5. Egentibus opem dare.
- X. Refert quo animo id faciamus.
- XI. Liberalitati inimica avaritia.
- XII. Historia de Samaritano.
- XIII. 6. Contra nos peccantibus ignoscere.
- XIV. Dei erga nos benignitas causa cur in alios benigni simus.
- XV. Extendenda charitas in hostes.
- XVI.
- XVII, XVIII. Et in malos.
- XIX. Plurimae cause cur Christus hoc preceptum nobis commendarit.
- XX, XXI, XXII. Ut prejudicia ex Judaeorum animis amoveret.
- XXIII.
- XXIV, XXV. Ut suos artius connecteret.
- XXVI. Ut felicitatem hominum promoveret.
- XXVII. Naturae hominum consentaneum.
- XXVIII. Ab exemplo Christi commendatum.

- I. **N** OVI Fœderis libros legenti occurrit illico, universam eam benevolentiam, quam charitatem vocamus, rem primariam

am esse in Christianâ religione. Virtutem hanc, quæ multas alias in se complectitur, tam frequenter nobis commendârunt, et ipse Christus, et apostoli ejus, ut nemo, qui legit, uterque parum curiosus, quid de eâ præceptum sit, ignorare possit; imò S. Paulus omnibus eam Spiritûs Sancti dotibus præponit. *Quamvis, inquit, loquar linguis hominum atque angelorum, si tamen charitatem non habeam, sio tanquam æris sonitus, aut tinnitus cymbali. Did patitur, et benigna est charitas; nulli invidet; non magnifice se effert; non facile ad iram moveitur; nihil mali de aliis putat; non aliorum scelere gaudet; omnia tegit, omnia credit, omnia sperat, omnia sustinet.*

II. Quò faciliùs intelligatur virtutis hujus, quæ latissimè se extendit, vis atque præstantia, ea, quæ sequuntur, in sex partes dividam. Jubet itaque nos charitas, sive in universos diffusus amor, atque benevolentia,

1. Nihil mali de aliis putare.
2. Discordantes conciliare.
3. Rebus prosperis aliorum gaudere.
4. Adversis indolere.

• 1 Cor. xiii. 1, &c.

H

5. Egen-

5. Egentibus opem dare.

6. Contra nos peccantibus ignoscere.

III. 1. Nihil mali de aliis putare. Sunt qui nescio quâ animi malitiâ laborantes, quicquid alii dicant, aut faciant, in peiorem partem interpretantur; in crimen voces, in scelus facta detorquent. Si quis laude dignum fecerit, ex utilitate ipsius id ortum affirmant, non ex animi bonitate. Si quis ornatur atque prædicetur, veteres aliquas suspiciones, nullo auctore emissas, producunt, imò et augment; aut suspensis obscurisque verbis, plus se scire, quàm fari velint, significant; aut si, ut ferè accidit in famâ viri optimi atque integerrimi, nihil mali dicere audeant, ne quid boni dicant, silent. — At, verò Christiani est officium de omnibus bona omnia dicere; nec rumores, qui alienas famæ noceant, avidis auribus excipere, nedum eos in vulgus spargere; quicquid boni fecerint, ex bono animo id ortum putare, meritisque adeò laudibus evehere; quicquid mali, si fas, celare.

IV. Qui alios aggressurus est, seipsum semper concutiat; sibi enim fortasse aut natura, aut consuetudo mala, ea ipsa vitia iniecit, quæ

quæ in aliis reprehensurus est. * *Quomodo
dicas fratri tuo, Frater, sine extraham festucam
quæ est in oculo tuo, non videns trabem, quæ est
in tui ipsius oculo?*

V. 2. Discordantes conciliare. Eo nos a-
nimo formavit Deus Optimus Maximus, non
ut, ferarum more, alius alii insidias pararet,
cædemque intentaret, sed ut mutuam bene-
volentiam in vicem exercentes, quicquid fe-
licitatis hæc vita haberet, simul eo frueremur,
quicquid calamitatis, id simul levare conare-
mur. Fœdus hoc amicitiae vinculis arctiori-
bus ligavit, atque connexuit Christus: † *Ex
inde scient omnes esse vos meos discipulos, si cha-
ritatem habeatis alii inter alios. Quicumque
igitur inter principes bella, in civitate sedi-
tiones, in domo jurgia, in foro lites, fovet
atque incendit; quicumque homines, ad pa-
cem atque amicitiam natos, in dissensiones
urget; is profectò, quocumque se nomine ap-
pellet, Christi non est discipulus. Qui verò
reges iratos conciliat, qui à civibus suis incen-
dium atque cædem prohibet, qui rixantium
discordias tollit, domesticas compescit, fo-
renses componit, is est quem Christus suum*

* S. Matt. vii. 4.

† S. Joan. xiii. 35.

60 De Officiis Christiani Hom. erga Homines.

esse agnoscit. * *Beati sunt pacifici, ii enim filii Dei vocabuntur.*

VI. 3. Tertium genus charitatis est, *aliorum rebus prosperis gaudere.* Sunt quidam adeo sui amantes, quorum animi adeo angusti sunt, ut si quid insperatae laetitiae aliis contigerit, id auribus averfis, et immotâ mente, accipiant. De se, suisque nimis solliciti, quid de cæteris fiat, parum curant. Jubet autem homines Christus, nihil humani à se alienum putare; et si fraterno animo alii alios amemus, quicquid ad fratrum felicitatem spectat, id ad nos quodammodo redundare putabimus.

VII. Non autem in omni aliorum gaudio gaudeamus oportet. Quosdam laetitiam afficiunt immodicae divitiae, quæ malorum ferè sunt irritamenta: quosdam evēhunt immeriti honores, à quibus tamen, invidiæ subjecti, præcipitantur. Si verò bonus quis, paupertate gravi diu oppressus, emerferit; si morbo aliquo dudum afflictus, ex insperato ad salutem vitamque redierit; si uxores cum viris, parentes cum filiis, fratres cum fratribus, amici cum amicis, discordiis compositis, in gratiam interint; præsertim si quis, postquam à virtute aberraverit, omnique se scelere con-

* S. Matt. v. 9.

taminaverit,

taminaverit, ad bonam frugem redierit; propter hæc omnia seriò triumphare, id demum Christiani est officium.

VIII. 4. Utque rebus aliorum prosperis gaudere, ita adversis indolere, oportet. In vitam hanc, tanquam in mare importunum, mittimur; ubi à ventis, procellis, scopulis, cavendum; neque sub undis aliquem præcipitari, atque demergi videamus, quin eodem tempore putemus, posse idem & nobis accidere. Hinc in animo misericordia exoritur; quâ tum denique potissimum movemur, cum alios id pati aspicimus, quod nos ipsos aliquando passuros timemus. Saxis durius est illius pectus, qui flenti nequit adflere; quique oculo irretorto, et festino pede, mœrentium domos præterit.

IX. 5. Nec satis est ut aliorum infortuniis indoleamus, sed levare etiam oportet, et *egentibus opem dare*. Omnibus debentur auxilium, consilia, sermones, cohortationes, consolationes; nec putemus nobis à Deo plus ingenii datum esse, ullam aliam ob causam, nisi ut aliorum patrocinium suscipiamus; nec plures divitias, nisi ut iis in aliorum miseriis sublevandis, utamur.

X. Plurimum autem interest, quo animi affectu, inopi atque prostrato opituleris. Sunt enim;

62 *De Officiis Christiani Hom. erga Homines.*

enim, qui nescio quo cæco impulsu acti, ja-
centes in triviis mendicos opibus potius adju-
vare dicantur, quàm animis misereri. Sunt
quoque, qui, ut ipsi magnifici et liberales ha-
beantur, bona sua immerentibus perindè ac
merentibus largiuntur; quorum neutros eo
præmio dignos existimem, quòd clementibus
in cœlis reponetur; * *Beati sunt misericordes,*
nam iis tribuetur misericordia. Ratione facul-
tatum habitâ, liberalior sit ille qui minam,
quàm qui talentum erogât; nec gratius ullum
Deo erat munus, quàm qui à viduâ oblatus
est † obolus.

XI. Huic, de quâ loquimur, liberalitati,
nihil tam inimicum est, quàm avaritia, vitio-
rum omnium, si quod aliud, contemptu odio-
que dignissimum. Argumenta ad hoc pro-
bandum proferre, non operæ pretium esse
puto; nec ostendere, quo modo clementiæ
fontes omnes in eo claudantur, qui opibus
suis pro Deo inservit: libet potius elegantissi-
mam istam historiam de Samaritano, quem
Boni cognomine appellamus, narrare, qui
Christum ipsum auctorem habet.

XII. † *Ibat quidam viator ab Hierosolymis Hi-
erocbuntem, quem vulneratum, vestibusque exu-
tum, semianimem latrones reliquerunt. Et forè*

* S. Matt. v. 7. † S. Marc. xii. 42. † S. Luc. x. 30.

devenit in eundem locum sacerdos quidam, eoque viso, præteriiit. Item Levita vidit eum, visoque præteriiit. Quidam autem Samaritanus, dum iter faciebat, conspexit eum, et misertus, accessit, et, vino oleoque infusus, vulnera ejus fasciis involvit, suoque jumento impositum ad diversorium deduxit. Mane discessurus protulit duo denaria, quibus camponario, datis, 'Cura eum,' inquit, 'et quicquid ultra in eum eroges, cum rediero, tibi solvam.' 'Utrum horum,' inquit Christus legisperito, ei proximum credis, qui à latronibus spoliatus est?' respondet iste, 'Qui illius misertus est.' 'Abi ergo tu,' ait, 'et fac similiter.'

XIII. 6. Contra nos peccantibus ignoscere. Restat ut pauca dicam quibus ad ignoscendum iis parati sitis, qui in vos aliquid commiserunt. Qui vindictæ cupidinem in corde fovet, et impacato odio aliquem infectatur, is sub Satanz, non sub Christi signis militat. * Si quis vobis inimicus sit, quo modo Christus vobis veniam peccatorum dedit, vos aliis item. Injurias patienter ferre nostrum est, Deo alia omnia permittentes: † Ulcisci meum est, ego rependam, inquit Dominus. Qui surgentes iræ tumultus non compestuit, sæpe in magnum aliquod malum imprudens cecidit; illum verò longè pejorem judico, qui

* Col. iii. 13.

† Rom. xii. 19.

64 *De Officiis Christiani Hom. erga Homines.*

inveterascere odium in pectore finit; qui, composito in præsens et animo, et vultu, occasionem lædendi expectat; utque vetus ille humani generis hostis, nunquam eum insequi cessat, cui semel irascitur, donec funditus perdidit.

XIV. Quo autem ore Deum Optimum Maximum aggredi audebimus, precantes, ut quicquid pravi fecerimus, nobis ignoscat, cum ipsi tamen in nos peccantibus non ignoscimus? Maxima est Dei erga nos benignitas; plurima sunt nostra erga eum peccata; an igitur nobis ea ut remittantur oramus, aliis delicta sua ipsi non remittentes? An ipsi, mille talentorum debitores, eum in vincula conjiciemus, qui centum nobis debeat denarios?

XV. In omnes itaque extendatur benevolentia, nec in propinquos, cognatosque solum sed etiam in hostes insensissimos. * *Audiivistis dictum esse, Amabis proximum tuum, et oderis inimicum tuum; ego verò vobis dico, Amate inimicos vestros.*

XVI. Sunt, qui nescio cujus perfectæ virtutis sibi conscii, omnibus se benefacere velle affirmant, nisi malis et improbis. O, dementes, et insanâ correpti superbiâ? Nonne immaculati istius Agni pro peccantibus sanguis

* S. Matt. v. 43.

fusus est? Vestrine oculi adeò puri sunt, ut scelestos intueri nequeant?

XVII. Quis verò misericordiâ dignior, quàm iste, qui dementibus furiis actus, per omnem vitæ cursum, nihil aliud agere videtur, nisi Deum Omnipotentem ad iram provocare, Christumque (ut aiunt) cruci iterum adfigere? Miserrimus ille profectò, omniumque comploratione lamentandus. Si in se descendat, et pectus suum inspiciat, nihil illic nisi tumultuosos, et discordantes æstus, inveniet. Si præteritam vitam paulisper recorderetur, turbatæ menti occurrunt illico cædes, rapinæ, adulteria, Dei minantis, monentisque contemptus: si verò, quid sibi futurum sit, quærat, tristior fit, et terribilior prospectus; mortis vicinæ timor continuus, et æterni supplicii non suppressendus horror.

XVIII. An igitur fratrem, his calamitatibus oppressum (pro quo, etiam si adhuc respiscat, mortuus est Christus) utpote benevolentia nostrâ indignum, et contemptum, præteribimus? annon potiùs fovebimus eum, et in vias virtutis aberrantes pedes revocare conabimur? annon Deum orabimus, ut, quod fuerit ignoscat; quod sit, corrigat; quod futurum, dirigat? annon eo à scelere converso lætabimur; cum *latitia sit in ca-*

* S. Luc. xv. 10.

Ille propter unum peccatorem, quem delictorum
peniteat?

XXIX. Proinde sunt cause, cur Christus
novum hoc præceptum suis tradiderit.

XXX. Primo enim, ex animis Judæorum
præjudicatis istas opiniones de Gentibus, era-
dicare voluit. Suis enim ritibus, et cæremoni-
is, adeo obstricti illi erant, ut omnes odio ha-
berent, qui nec à patre suo Abrahamo ortum
ducerent, nec in Sione Jehovam colerent.
Nec mirum, si à cæteris disjuncti, Deoque
ipsi dicati, vicinos populos contemnerent,
non in iura ulla pecuaria acceptos, nullam
promissam hereditatem sperantes, ignoran-
tiæque, et idololatriæ sepultos, atque obrutos.

XXI. Ad promovenda consilia, servandam-
que inter homines Dei Veri noticiam, ne-
cessaria erat hæc Judæorum à cæteris disjunc-
tio. Si enim societatem, et foedera cum idola-
colentibus inissent, si ex Philistæorum atque
Amoritarum virginibus uxores duxissent, et
civiles et religiosos eorum ritus paulatim ad-
optassent.

XXII. Cum autem ille dies advenisset, quo
beneficia, in unum adhuc populum collata, in
universum humanum genus diffusa erant, cum
et Judæi, et Gentiles, ejusdem foederis par-
ticipes, eandem ad aram sacra faciebant, ini-
quas has de cæteris cogitationes æquum erat

eos deponere, omnesque omnibus officiis prosequi.

XXIII. 2. Altera erat causa, cur universam hanc benevolentiam discipulis suis Christus præceperit, quia novit, quantum iis laborandum esset in propagandâ novâ religione, quæ nec affectibus hominum, nec præjudiciis blandita est, eoque, arcto quodam vinculo, charitatis scilicet, colligare eos, et connectere voluit. * *Veni, inquit, non pacem in terram, sed gladium missurus.* Absit ut putemus, mitem illum, et mansuetum Jesum, cujus vita hominibus benefaciendo est acta, tandemque, ut in æternæ felicitatis spem fontes eos, damnatosque vindicaret, deposita, voluisse, ex sanctâ suâ religione, tot scelera, tantam immunitatem ortam fore: cum verò liberè ut amplecterentur veritatem, eamque liberè repudiarent, hominibus ipsis concessum erat, prævidit profectò, et ab externis hostibus, internaque discordiâ, quot calamitatibus sui subjicerentur.

XXIV. Quod futurum Christus prædixerat, id protinus accidit. Vix hominibus se ostenderunt nova hæc documenta, cum plurimi contra ea armarentur: et licet eursu rapidissimo regiones omnes pervagata sint, adeò ut populi maximè diffusi, et longissimè à Judæâ amoti, Christi meritis confiderent,

* S. Matt. x. 34.

in ea tamen conjurati sunt philosophi, magistratus, principes; quique in iis disseminandis occupati erant, non modò contemptu, atque odio excipiebantur, sed inter acerbissimos cruciatus animas sæpiissimè expirârunt. Ut prophetarum priscis temporibus, ita nunc, sanctorum sanguine Hierosolymarum scedatæ sunt viæ; plurimique Apostolorum, divini sui magistri exemplum sectuti, ad confirmandam istius religionis veritatem mortui sunt, quam et illustrârunt præceptis, moribusque commendârunt.

XXV. Qui eandem ob causam acerbi aliquid patiuntur, ii ferè societatem arctissimam ineunt, aut ut in vicem se defendant, aut saltem consolentur. Sed inter primos Christianos perrarò hoc factum invenimus. Diversi illico præceptores, diversæ sectæ sunt exortæ. • *Ego*, inquit unus, *sum Pauli*; et ego, alter, *Apollo*; ego vero, *Cephæ*; at ego, *Christi*. Ex diversitate hâc opinionum, id quod sæpè fieri videmus, in iram, ex irâ in jurgia proruperunt, et evangelica ista pax in discordiam prorsus mutata est. In hæc itaque mala remedium, quæ futura prævidit, novum hoc præceptum, universam scilicet charitatem, suis Christus commendavit.

• 1 Cor. i. 12.

XXVI.

XXVI. 3. Tertia erat causa, cur novam hanc legem de amore tulerit Christus, quia sciverit ab eâ quàm plurimùm pendere hominum felicitatem. Ex nimio Sui amore omnes ferè oriuntur, quas ploramus, calamitates; ex hoc fonte amarissimo profluunt ira, invidia, bella, strages; corruunt urbes; vastantur agri; vitia grassantur omnia.

XXVII. Utque ad felicitatem nostram promovendam officium hoc spectat, ita naturæ nostræ quàm maximè consentaneum est. Affectibus rectè compositis, nunquam tantùm sibi satisfacit animus, quantùm cùm aliis benefacit. Plena est calamitatibus hominum vita; opem atque auxilium nostrum quotidie invocant, aut re, aut corpore, aut animo laborantes. Mœrentium domos inire, solatium afflictiis afferre, egentes sublevare, suum secum fert præmium, Deoque clementissimo clementes commendat. * *Si quis Deum amet, amet*

etiam et fratrem suum. Quicumque grato animo ea recordatur beneficia, quæ à patre suo cœlesti ipse acceperit, aliquem ex fratribus suis inopem, atque prostratum immotis oculis intueri non potest: quique officium hoc verè præstitit, æternâ felicitate inter eos potietur, quorum benevolentia universa, quorum amor infinitus est.

* 1 Joan. iv. 21.

XXVIII. Si quandò dubitemus, quoties alicui ignoscendum sit, et quid nobis pro aliis faciendum, esse nos Christianos recordemur, Christique aded exemplum ante oculos nobis proponamus. E gremio Patris Omnipotentis processit Filius ejus unigenitus; nostra peccata ut elueret, mortem passus est, ad qua eluenda nihil aliud valuisset. Regionibus coelestibus relictis, nostram sibi naturam induit: * *ad suos venit, et etiam sui cum non agnoverunt.* Vita ejus plena erat miserie, neque ullus erat dolor similis istius dolori. † *Ob mala nostra vulneratus; peccata ob nostra contusus est. Tanquam agnus ad caedem ductus est, à carcere atque à judicio trahabatur, et abscindebatur à viventibus.* Talis Dei erga homines erat amor: pro nobis carne vestitus; pro nobis cruci est affixus; pro nobis in orcum descendit; pro nobis resurrexit; urbis istius, cujus in coelis sunt fundamina, prospectum nobis aperuit; propositasque foederis conditiones servantibus morte suâ vitam nobis peperit. Recordetur hæc, quicumque sit, qui metuit, ne alteri nimis benefaciat.

* S. Joan. i. 11.

† Is. liii.

C A P. XI.

De Animi Humilitate.

I. *Humilitas animi Christiani officium.* II. *Hanc ex animo evellit superbia.* III. *Quæ ferè oritur, aut ex genere, aut doctrinâ, aut divitiis.* IV. *A Deo hæc omnia accepta.* V. *Calamitates patienter ferendæ.* VI, VII. *Historia Jobi.* VIII. *Fides in Deo reponenda.*

I. **E**ST et hominis, præsertim hominis Christiani officium, de se modeste atque submisit, et putare, et loqui: neque sibi ea, quæ non habeat, arrogare; neque illa, quæ habet, insolenter nimis jactare. Quicquid enim habemus, id omne à Deo accipimus, qui, quæ hodie dedit, si volet, cras auferat.

II. Hanc virtutem ex animo evellit, atque eradicat insolens, atque viro indigna, superbia. Hinc fit, ut vitia nostra iniquis oculis prætermittamus; hinc fit, ut majora meritos nos, quàm quæ contigerunt, putantes, sortis nostræ simus impatientes. Quod enim pluris aliquis sese æstimat, eò minùs, comparatione inter merita sua et possessiones factâ, id æstimat, quod habet. Quin, si in cœlum admitteretur, nondum exurâ superbiâ, etiam felicitatis

tis eum suæ poeniteret, si alios feliciores aspi-
ceret.

III. Jam verò videamus, quænam sint ea,
de quibus superbi adeò magnificè sese efferunt.
Aut enim *generis splendore* capti, aut *doctrina*,
aut *divitiarum*, omnes alios ludibrio habent,
et contemptu. Quid autem? An his funda-
mentis innititur superbia? An hæc sunt, prop-
ter quæ homines, in diem tantum nati, coli
atque adorari, sperant? Hic à longo tyranno-
rum ordine proavos suos deducens, alios fastu
insolenti despicit; nec illos ex eadem familiâ
exortos esse considerat, ex eodem luto forma-
tos, iisdem infirmitatibus laborantes, et ex eo-
dem Deo misericordiam sperantes. Discet
autem, ubi in sepulchro contumulentur ossa,
nullum esse inter potentes atque infimos dis-
crimen; * *ibi enim jacent et superbi et humiles,*
liberque cum domino servus requiescit. Ille prop-
ter fortunæ dona, mille casibus subiecta,
mille vicibus obnoxia, cultum et honorem à
pauperioribus exposcit; citò tamen inveniet,
† *nihil nos in mundum nobiscum tulisse, nihilque*
exinde ablaturus. Alius doctrinâ, atque inge-
nii dotibus confusus, quasi ex viliori quâdam
materiâ conflatos, rudes et imperitos homines
contemnit; at verò scire se nihil planè con-

* Job. iii. 1.

† 1 Tim. vi. 7.

festus est ē philosophis antiquis sapientissimus; longāque demum experiētiā id unicum vel Solomo invenit, * *Vanitatem esse omnia, atque animi sollicitudinem.*

IV. At verò qui superbiā laborat, hoc insuper secum reputet, etiam doria hæc, levia utcunque, et ludicra sint, non à se, aut à suis dotibus procedere, sed à largā Dei Omnipotentis manu. Illo se fretum meminerit; ad illius nutum, vitam se sustentare, unde eam acceperit; ē pulvere demique se exortum, ad pulverem rediturum. Desinat itaque superbe cogitare, et in altum evehi; desinat eos insolenter intueri, quibus idem in cœlis est pater; suæque sibi infirmitatis conscius, et quā sit stultum superbi agnoscens, audiat verba S. Joannis, † *Fastus vitæ à patre non est*; audiat eum qui dicit, ‡ *Ex me discite, ego enim humilis sum, animique submissi.*

V. Nec modeste tantum de nobis putare oportet, sed si quid mali nobis divinitus accidat, æquo id animo, et patienter ferre, sive inde rei, sive salutis detrimentum, aut damnum oriatur. Idem qui fecit nos Deus, nobis omnia concessit, uxorem, liberos, rem, salutem, vitam; quæ si aliquandò revocet, ea humanæ mentis est debilitas, ut non lu-

* Eccles. i. 14. † 1 Joan. ii. 16. ‡ S. Mat. xi. 29.

74 *De Officiis Christiani Hom. erga Homines.*

gere, cùm perdiderit illa quæ charissima habuerit, vix possit; queri nefas.

VI. Sanctissimi illius Jobi exemplum ante oculos proponamus. * *Venit ei nuncius, dixitque; 'Boves tui arabant in agro, et asini tui juxta pascebantur; et ecce! Sabæi, in eos irruentes, abstulerunt, imo et servos tuos gladio necârunt: aded ut ipse solus relictus sim, qui tibi hæc dicam.'* Eo loquente intervenit alter, dixitque, *'Ignis à celo decidit, ovesque tuas, et servos tuos exussit, et consumpsit; aded ut ipse solus relictus sim, qui tibi hæc dicam.'* Eo dicente, venit alius; *'Filii,' dixit, 'et filia tue edebant, et vinum potabant in fratris primogeniti domo; et ecce! ventus vehemens ab eremo quatuor angulos tecti percussit, quod in juvenes concidit, ita ut mortui sint; et ipse solus relictus sim, qui hæc tibi dicam.'* Quid autem his malis oppressus fecit Jobus? Non queri, non lugere, vix loqui ausus, in terram pronus decidit; *Nudus, inquit, ex utero meæ matris veni, et nudus redibo; Deus qui dedit, idem abstulit: nomen Dei laudetur.*

VII. Nec bonorum solùm direptionem, sololisque suæ desiderium perpessus est, sed et ipse, gravi morbo afflictus, à pedum plantis ad capitis verticem crudis vulneribus cooper-

• Job. i. 14, &c.

tus

tus est. Adit itaque jacentem, et prostratum in pulvere, torq[ue] consiliortumque particeps. Quousque, inquit, graves h[ab]as calamitates sine questu patieris? Quin age, Deum execrare, et morere. Ille autem, Loqueris, ait, ut una ex stultissimis loquitur. Bonumne à Deo accipiemus, et malum accipere dedignabimur? Felix est, quem corrigit Deus; ille enim, quos vulnerat, sanat; remediumque feret idem, qui et morbum tulit.

VIII. Ab exemplo Jobi discendum est, non modò quicquid nobis Deus intulerit, id patienter tolerare, sed et fidem in eo penitus reponere. Promissis Dei, Christique meritis confidere, inter Christiani officia primum est. Hinc oritur in malis solatium, in calamitatibus patientia, in rebus secundis humilis animus, in adversis non dejectus; hinc denique pendet omnis et vitæ futuræ spes, et præsentis felicitas.

CA P. XII.

De Officio Filiorum erga Parentes.

I, II, III, IV. De parentum curâ in servandis, et erudiendis filiis. V. Unde oritur filiorum erga parentes amor. VI. Qui ex duabus causis deducitur, VII, VIII. grato animo, IX, et religione. X. Deus hominum est pater. XI. Inde deducitur erga parentes obedientia. XII. Quale sit hoc officium. XIII. Paternam rem dilapidare nefas. XIV. Officium hoc ab Jesu commendatum, XV. et à Siracbi filio,

L. **D**E U S, qui suis optimè providit, humano pectori affectus quosdam inseruit, tardum rationis consilium non expectantes, et ad felicitatem hominum promovendam, ubicunque opus esset, statim se exercentes, Inter hos nullum magis universum puto, sollicito isto amore, quem excitat in cuiusque parentis corde, suæ sobolis servandæ, tuendæque cura. Immanissimus profectò sit ille, si quis hoc affectu non moveatur: neque enim volucres nidos suos deserunt, simul ac oves incumbere desierint; nec ab antro discedit sævus iste nemorum tyrannus, donec * ca-

* Psal. civ. 21.

*tulis suis satis virium sit, ut ad prædam rugiant,
et escam à Deo quærant.*

II. Quòd si non ita se res haberet, miseranda profectò esset hominum conditio. Ad propagandum genus cupiditatibus nostris incitati, de conservando parum essemus solliciti. Brachia sua ad opem implorandam infans frustra extendisset; in fletus frustra prorupisset; nemo ei auxilium tulisset; * *non exceperunt eum genua, nec ubera, quæ suggeret.*

III. Noluit verò Deus, homines ad altiora natos, simul ac è portu excefferint, fluctibus jactatos, et quasi naufragos, relinquere. Cupiditatibus, et libidinibus nostris, tuendæ etiam sobolis curam addidit; jussitque, ut amor iste, quo connecterentur sexus, servando generi inserviret. Hinc effusa ista lætitia, quæ parentis pectus distenditur; hinc risus isti cum lacrymis commixti, qui nisi materno in vultu perarò locum habent.

IV. Nec verò amor iste, si ratione, id quod semper oportet, rectè sit temperatus, in blanditias solùm prorumpit, sed latius se extendens, in futurum consulit. Hinc ab ignaviâ pueros detorquere, virtutisque et religionis præceptis imbuere, parentis est officium; et rarò fit, ut hominem videamus adedò perdi-

* Job. iii. 11.

tum, quin cupiat, et ex animo conetur, liberos suos, et magis probos, et sapientiores seipso fore.

V. Exinde oritur mutuum filiorum erga parentes officium. Cum verò hic affectus ad servandum genus hominum, non adeò necessarius sit, nec tam violens, nec tam universus est. Quod si eum perpendamus, commendatum potius à ratione nobis inveniemus, quàm insitum à naturâ. Hinc fit, ut cum rarò filius amore aliquo prosequatur patrem difficilem, atque morosum; multos parentes filiorum vitiis et scelere gravatos, et quasi incurvatos videamus. Hinc de priore illo officio, parentum scilicet erga filios, utpote lege eâ, quæ nascentibus nostris inscribitur, commendato, silent penè sacræ literæ; dum posterius, filiorum scilicet erga parentes, utpote rationis potius, quàm naturæ officium, inter decem ea quæ præcepit Israelitis Deus, locum habet; * *Honora patrem tuum, et matrem tuam.*

VI. De officio filiorum erga parentes dicturus, duobus id ex causis deducam, ex sensu beneficiorum acceptorum, et ex religione.

XII. Grati animi officium exoritur ex sensu accepti cujusdam beneficii, quod alio modo rependere non possumus, quàm confitendo,

* Exod. xx. 12.

nos id debere. Si enim parem gratiam referamus, cessat officium; quod profectò humano animo adedò ingenitum est, ut nisi generosiores omnes affectus penitus eradicerentur, nequeat convelli, aut amoveri. Imò etiam illi, qui contemptis Dei monitionibus, scelere omni se contaminârunt, eos tamen colunt quodammodò et venerantur, à quibus ipsi beneficia acceperint. — Si verò ita se res habeat; si hoc, de quo loquor, officium, vim potius ut evellatur postulat, quàm culturam, ut augeatur; quàm perditus, quàm nullius animi sit is, qui ne minimùm quidem eo movetur; præsertim erga illos, qui etiam ingratißimum amare non desinunt: quod ferè fit inter filios, parentesque? Naturæ voces benignissimæ, pueritiæ innocentis recordatio, filii causam disertissimè agunt; dum parentis nec amor, nec anxietas, intemperantiam juventutis refrænare, et effusissimos libidinis æstus coercere potest. Ad oreum interea descendit morbis, et miseris coopertus; et elatum sequitur filius eodem animo, quo conducti in funere, qui lacrymas pretio vendunt, doloremque fingunt, cujus corda sua sunt expertia.

VIII. Ex difficili quidem, et morosâ parentis auctoritate, oritur filii invita, et tristis obedientia. Nec mirum; pertinaces enim sunt animi cupiditates, et in omnes habet imperium

rium amor Sui. Ei alios affectus inferere possumus; sed ex corde eum penitus avellere, aliosque in loco ejus seminare, nemini datur. Ubi verò pater adeò non acerbus est, ut utilitati, imò et cupiditatibus filii sui, pareat atque obsequatur; ubi nihil studet, nihil molitur, nisi ut felicitatem ei pariat, et misérias avertat; ubi non tantùm eum re suâ communicat, sed sibi multa negat, ut ille pluribus perfruat; sceleratissimus profectò sit, qui inobedientiâ, animoque ingrato patrem negligit; et futili simul consilio, contemptâque ejus auctoritate, se in perpetuum liberari vehementissimè exoptat.

IX. Ut officium hoc præstemus, jubet gratus animus. Quid autem religio? nonne et ipsa idem monet? non enim in vitam hanc, ut nullâ necessitudine conjungeremur, prodiimus, sed ut alii cum aliis diversis modis connecteremur, unde plurima deducta essent officia. His ut fungamur officiis, omnes oportet; et quicumque iis optimè fungitur, Deo plurimùm placet. Est igitur officium populi erga regem suum, est et regis in populum; uxoris erga maritum, et mariti vicissim in uxorem; nullam verò justiore, neque graviorem causam necessitudinis puto, quam beneficia à parentibus accepta, nec vita solùm, sed

sed omnia etiam ad bene beatèque vivendum nobis ab iis concessa.

X. Deus, ut amorem erga suos ostendat, patrem se omnium vocat. Eo itaque nomine appellamus, quoties illum precibus adimus, quod nobis ab ipso Christo imperatum est. Cum itaque vim, et significationem istius nominis, cum necessitudinem filiorum cum patribus, patrumque amorem erga filios perpendimus, gaudere profectò, et exultare oportet, esse nobis in coelis patrem.

XI. Observantiam, atque cultum à nobis poscit Deus, utpote pater. Num quid clariùs, aut plenius indicat, quàm observantiàm, quò cultu, pater à filio colendus sit? Quod ratio nos antè docuerat, id confirmat patefacta nobis in sacris scripturis Dei voluntas: nec, qui officium hoc prætermittit, cætera eum vitæ officia credo religiosius servaturum; eadem enim scelera, quæ aliquem, malus ut filius sit, efficiunt, facient etiam ut malus sit maritus, malus pater, civis malus.

XII. Quale itaque est officium id, quod parentibus debemus, et quo more eo fungendum est? Hoc profectò ex rebus variis pendet. Habenda est ratio loci, temporis, facultatum. An morbis atque ægitudine laborat pater? respice eum, qui morbos, ægitudinemque quam sanavit, cum tibi à te nihil erat auxilii.

An egestate mater opprimitur? reminiscere illius, cujus ubera duxisti. At si hoc non fit, si nihil à nobis exigunt, nisi ut amicitiam amicitia, et amorem amore rependamus; senectutem eorum colere, curas lenire, dolores mitigare, votis praevenire, id filii cujusque est officium: quod qui negligunt, iis S. Paulus locum dat inter * *oppletos omni injustitia, malitia, scortatione, improbitate, avaritia; inter plenos invidia, rade, contentione, dolo, malignitate; inter susurrone, oblocutores, Deseros, injuriosos, superbos, gloriosos, inventores malorum; inter sedifragos denique, desipientes, charitatis expertes, implacabiles, immisericordes.*

XIII. Nec leve illorum est peccatum, qui rem patris, eo vivo, distrahunt, atque dilapidant. Is ferè parentis est amor, ut ne quid filio defuit, multa sibi ipse deneget. Vivit aliquando à sociis amotus, sordidus, atque sordidatus, ut inter cœtus hominum splendeat, et triumphet filius; quidvis sibi satis putat, si modò ad voluptates explendas, et juventutem feliciter agendam, illi sufficiat. At verò nequissimus est ille, qui, parentis oblitus, in sumptus se nimios præcipitat, et ære alieno laborans, ad paupertatem eum, saltem ad rem ita contractam deducit, ut ea, quibus

* Rom. i. 29.

senectus

senectus indigeat, sibi nequeat indulgere, ne in carcere, et tenebris animam suam expiret is, quem genuit.

XIV. Quid, quodd officium hoc ab ipso Jesu nobis commendatum habemus: ille enim moriens, inter acerbissimos cruciatus, ei, quem amavit, discipulo, matrem suam tradere non oblitus est; dixit enim illi, * *Mulier, en filium tuum!* et discipulo item dixit, *En matrem tuam!*

XV. Non pigebit verba sapientissimi istius, quisquis fuerit, Sirachi filii proferre. † *Auxiliare, mi fili, patri tuo senescenti, nec dolore eum afficias, quamdiu vivat. Quodd si mentis facultates deficiant, feras eum patienter, nec contemnas, quia plenis viribus ipse potiaris. Non enim irritum erit, si patri opituleris; memoria autem habebitur eo die quo luctu opprimeris; velut aestivo sole glacies, ita eliquescent peccata tua.*

* S. Joan. xix. 26.

† Eccles. iii. 12.

C A P. XIII.

De Homicidio.

I. Duobus modis homicidium fit. II. Plurimæ homicidiorum causæ. III. Qui alium in vitæ suæ discrimen urget, insons non est. IV. Nec qui rixantes ad cædem provocat. V, VI. Deo irrisissimum esse hoc peccatum probatur. VII. Homicida quod Dei est sibi vindicat. VIII. Pœna huic crimini adjuncta. IX. ad finem. Historia de Nabothi vinea.

I. **S**Ummum injustitiæ genus est, alteri vitam suam eripere. Hoc duobus modis fit, vel vi, vel fraude. Aut enim palam aliquis occiditur, gladio, vel fuste, vel mortifero aliquo telo; aut clàm, veneno, dolo, falsis delationibus.

II. Exoritur ferè secretum hoc homicidii genus, aut ex inveteratâ malitiâ, ut cùm odii explendi causâ in vitam alterius invehimur; aut ex avaritiâ, ut cùm, sublato clàm possessore, hæreditatem capeffit perditus aliquis, et discinctus nepos; aut interdum ex pudore, ut cùm infantulos suos perimit mater crudelis, ne sibi sint opprobrio.

III. Nec

III. Nec si aliquem incitamus ad ea facienda, unde vitæ suæ spatium in arctius contrahatur, ipsi insontes evadimus. Qui nimio vino invitum immergit, si potus iste aliquid foeleris faciat, in causâ ipse est ut is peccet; si quid iste inde patiatur, si morbo correptus è vitâ decedat, in causâ est, ut moriatur. Nec, humanis legibus absolutum, à Deo impunitum fore credibile est.

IV. Est et alia, nec infrequens ratio, unde homines, criminis hujus, de quo loquimur, non insontes sunt. Eos volo, qui alios ad iram, et ultionem irritant, qui querelas foveant, et ad cædem rixantes alliciunt: hi non modò Christi præcepto repugnant, qui suos esse pacificos jussit, sed homicidæ sunt, et sicarii.

V. Quàm turpe, quàm Deo invisum sit hoc peccatum, nemo est qui ignorat. * Hebelis interfecti sanguis Deum etiam è terrâ in-
clamavit. Imò † ipsa terra, in quâ cædes aliqua committitur, maculata et contaminata est; nec eluitur ista labes, nisi homicidæ sanguine. Et licet urbes, aræque institutæ essent, ad quas confugeret ille, qui alium invitum occiderat; qui ‡ tamen prudens sciensque hoc fecisset, ab ipsius altaris amplexibus ereptus, tortoribus necandus tradebatur.

* Gen. iv. 10. † Deut. xix. 12, 13. ‡ Exod. xxi. 14.

VI. Quid,

VI. Quid, quòd sola duo praecepta, quæ Noacho post diluvium data erant, ad hoc præcipuè spectabant: quorum unum à sanguine edendo homines cohibuit, ut inde scilicet nunquam cædi affuescerent: alterum pœnam delinquenti constituit: * *Qui effundit sanguinem hominis, per hominem illius sanguis effunditur.* Quibus verbis protinus subjicitur, *Quoniam ad imaginem suam hominem fecit Deus.* Est igitur hoc peccatum non modò, ut antè dictum est, summa erga hominem injustitia, sed erga Deum summa arrogantia. Quid enim est aliud, nisi imaginem Dei, ab ipso homini impressam, foedare atque delere?

VII. Aliquem insuper occidere, quid est aliud, nisi in Dei Optimi Maximi potentiam, et jus invadere? Hominum enim vitas ordinare, eripere, aut prorogare, ejus est, qui primum eas hominibus donavit. Qui verò cædem alicui machinatur, sibi arrogat à Deo ereptum in vitas hominum imperium, quod omnium est nefastissimum; quodque etiam ad *sui cædem* referatur, scelus, si quod aliud, audacissimum.

VIII. Utque peccatum hoc flagitiosissimum est, ita pœna nequaquam levis ei debetur. In sacrâ historiâ multa passim exempla legimus.

• Gen. ix. 6.

eorum,

eorum, quorum, contra omnium spem, scelus et crudelitatem pari supplicio compressit Deus; nec defunt apud profanos scriptores exempla huiusmodi quàm plurima; quæ si referre aggrediar, tam crebrò occurrunt, ut legenti tædium pariam. Libet verò ea, quæ de Ahabo, Samariæ rege, et crudeli ejus uxore, Dei vindictam in homicidas testantia, memorantur, vobis breviter proponere.

IX. Erat Naboth vinea, Ahabi, Samariæ regis, aulæ contermina. Dixit itaque Ababus Naboth*: *‘Vineam tuam velim mihi des, ut herbifera mihi sit; aliam tibi fertiliorē tradam; aut, si mavis, quanti sit, tibi rependam: est enim aulæ meæ contermina.’* Dixit autem Nabothus; *‘Absit ut paternam hereditatem tibi addicam.’*

Afflictum et iratum Ababum occedit uxor Jezebel. *‘Cur,’* inquit, *‘aded contristaris, et à victu abhorres?’* *‘Quia vinea Nabothi,’* inquit, *‘nec nummis mihi, nec agris emenda est.’* Illa autem, animi ferocis et intemperantis, mulier, *‘Tunc,’* ait, *‘Isrælitarum es rex? Surge, vescere, letare; vineam Nabothi ipsa tibi tradam.’*

Scriptis itaque literas Ahabi nomine, et sigillo regio obsignatas. *‘Jejunium indicite; Nabothum proferte; quin duo homines te-*

* 1 Reg. xxi. 2,

‘stimonio

‘ testimonio jurati affirmant, in Deum, et in
‘ regem maledicta eum, et opprobria effudisse;
‘ rapite eum, ex urbe educite, lapidibus obrutum
‘ cædite.’

Quod cum factum est, ‘ Surge,’ inquit Ababo,
‘ vineam Nabothi tibi arripe, quam pretio non
‘ vendidit. Fuit enim Nabothus.’

Ingrediendi autem vineam Ababo occurrit Eli-
as, propheta à Deo missus. ‘ An occidisti,’ inquit,
‘ Nabothum, et hæreditatem ejus invasisti? At
‘ scito, inultum hoc Deum non passurum. Quo e-
‘ nim loco lambebant catuli Nabothi sanguinem,
‘ ibi etiam tuum lambent.’

Quod semel constituit Deus, id profectò
nunquam est irritum.—Occisus paulò post
Ahabus, omnia ea passus est, quæ prædixerat
Elias. Nec marito suo diu superstes erat sce-
lerum hortatrix et particeps, Jesebela; è fe-
nestrâ dejecta in viam, contrita & conculcata
est; et Nabothi prope vineam, sicut antè
Ahabi, Jesebelæ quoque cadaver, canes vo-
rârunt.

C A P. XIV.

De Mendaciis.

- I. *Mendaciis tollitur usus loquendi.* II. *Mentiri vetantur Christiani.* III. *Quot mendaciorum genera sint.* IV. *Mentiuntur homines specie quoddam religionis ducti;* V. *aut malo animo, ut aliis noceant;* VI. *aut ut sibi benefaciant;* VII. *aut ex arrogantia, ut magnifici habeantur;* VIII. *aut è timore, ut celent ea quæ pravè commiserint;* IX. *aut ex animi levitate.* X. *Mendaces et Deo, et hominibus invisæ sunt.*

I. **C**UM inter plurima, reliquis animalibus negata, hoc hominibus concessum est, ut voces, sensusque suos dicendo no-
tent, et ita colloquia inter se ineant; indignissimus profectò est is, qui hoc munere abutitur. Veri imaginem exprimere verba oportet: qui verò aliud dicit, aliud cogitat; aut qui ea facta fuisse affirmat, quæ facta non sunt, detorquet in perniciem hominum id, quod in communem utilitatem datum est, Deique beneficiis it obviàm. Quòd si plurimi idem facerent, periret illico verborum usus; et melius esset silentio ævum transigere, velut mutæ

M

pceudes,

pecudes, quàm fallere, et falli. Si fides humanæ societatis tollatur, quid est, cur non in agris, iterum dispersi, vagentur? Sileant historicorum annales, si nihil nisi portenta et prodigiosa enarrant; sileat in æternum humana vox, nisi causæ veritatis inserviat.

II. Quin etiam verbis disertissimis mone-mur Christiani, ne mentientes nos invicem fallamus. * *Deposito mendacio*, inquit S. Paulus, *loquimini veritatem quisque proximo suo*: et ibidem, † *Ne mentimini aliis adversus alium*.

III. Inter varia mendaciorum genera, pauca quædam eligam, quæ vobis evitanda proponam. Mentiantur enim homines,

1. Specie quâdam religionis ducti, ut ad bonos exitus proposita sua perducant.

2. Malo animo, ut aliis noceant.

3. Ut sibi benefaciant.

4. Ex arrogantia, ut magnifici habeantur.

5. E timore, ut celent ea, quæ pravè commiserint.

6. Ex animi levitate.

IV. 1. Primum genus est eorum, qui, *specie quâdam religionis ducti*, mentiantur. Quid enim? an religio usque adeò per se debilis et infirma est, ut tali auxilio, talibus defensoribus indigeat? annon vera piæ vitæ præmia

* Ephes. iv. 25.

† Coloss. iii. 9.

satis homines incitent, nisi fucato quodam colore commendentur, et falsis insignibus decorentur? Ad virtutem recta, et simplex est semita; quòd si quis per ambages, et circuitus, ad eam te ducere conetur, totâ errat viâ. Et si quis affirmer, licere malè facere, ut majus inde bonum assequaris, quot exinde oriantur incommoditates, nemo est qui non videat. Hinc sub specie religionis latuerunt fraudes, injuriæ, rapinæ, cædes; hinc denique per totum terrarum orbem scelera flagitiosissima grassata sunt. Vitii autem parens esse virtus non potest; neque religio ea vera, et incorrupta est, quæ mendaciis, et erroribus sustentari possit.

V. 2. Secundum genus est eorum, qui *malo animo mentiuntur, ut aliis noceant.* Si iis veniâ carent, qui delicta aliena augent, proferunt, et in vulgum spargunt, nec humanis erroribus ignoscunt; quid de iis dicendum est, qui ea, quæ non inveniunt, peccata confingunt? Si ille, qui pecus aut rem alicui injustè surripit, capite supplicium luit; quam pœnam ille meretur, qui famam ei et existimationem, et re et vitâ chariorem, falsis mendaciis vulnerat? Ut eunque leges humanas interdum effugiat latronum iste pessimus, pœna tamen, licet claudis pedibus adveniat, antecedentem non

deferet. Patri enim mendaciorum se servum addixit, * *qui circumvagatur, quarens quos perdat.*

VI. Tertium genus est eorum, qui, *ut sibi benefaciant*, nihil falsi dicere non audent. Cum istiusmodi hominibus non agitur, nisi maximo periculo; parum enim curant, quibus infortuniis alios demergant, si ipsi inde ditiores evadant. Si igitur tibi se aliquid facturos polliceantur, ne credas; si quid accidisse affirmant, ne fidem iis habeas. Fallere enim et decipere docti, adeo mentiri consueti sunt, ut id unicum putent, utrum quod dicant, sibi sit profuturum, parum solliciti, utrum verum sit, necne. Quicumque igitur avaritiâ correpti nihil aliud laborant, nisi ut divitias sibi undequaque corradant, eos veritati non nimis studere pro certo habeas; per fas, nefasque ruere non metuunt; nec à latrocinio, et cæde abstinere, quod divinis legibus obtemperant, sed quod reformidant humanas.

VII. 4. Sunt etiam qui, *ut magnifici habeantur*, vanos se et mendaces præstant. Horum hominum genus est insulsiſſimum: non enim vindictæ, non lucri causâ mentiuntur; sed ut re, aut genere, aut doctrinâ, quàm sunt, majores habeantur. Hinc non modò menda-

* 1 Pet. v. 8.

cissiſſimi

cissimī fiunt, sed sæpe se in gravissimas calamitates trahunt, et ex damnosis voluptatibus ære alieno laborantes, serò denique plorant, se et dotibus, et fortunis suis non contentos, in has angustias incidisse. Quosdam generis splendor perstringit; et nihil aliud laude dignum existimantes, quàm à principibus nasci, quasi claros et ingenuos parentes haberint, magnificè se efferentes, fallunt quidem ignotos, at notis derisui sunt. Alii videntes, tantum esse cuique fidei, quantum pecuniæ, dites se haberi volunt, et sumptibus quotidianis, vanisque sermonibus, paucos forsitan decipiunt, sed à plurimis irridentur, et contemnuntur. At verò doctrinæ latius in homines est imperium; et nemo ferè est, qui non se literis imbutum haberi cupit. Mirum est, quot inde exoriantur mendacia! ut homines, literarum omnium penitus rudes, de rebus sublimibus magnificè loquantur! quot libros se legisse affirmant, de quibus nihil unquam audiverint! quot cum doctis necessitudinem habere, quos nunquam viderint! Nescio annon omnium mendacium hi insulsißimi sint: nullos enim, nisi seipsis indoctiores decipere possunt; omnibus verè literatis ludibrium exhibituri.

VIII. Maximus autem eorum est numerus, qui idcirco mentiuntur, *ut celent ea quæ pravè commiserint.*

commiserint. Cum poenæ præsentis timor tantum in homines imperium exerceat, non adeò mirum est, omnibus modis velle eos illam effugere. Hinc cædis, latrocinii, rapinæ, sibi conscius, rarò id, quod fecerit, confitetur; probè enim callet, à morte se vindicare non posse, nisi quod commiserit, commississe se neget. Sperat itaque mendacium posse se poenitentia eluere; vitam autem creptam novit se nunquam recuperaturum. At in tenuioribus quoque delictis, et supplicii levioris timore, mentiri nefas: animi enim servilis est dolorem magis timere, quàm veritatem amare; et potius quàm pauca quædam verbera subire, vnum et mendacem ultrò haberi.

IX. 6. Postremum genus est eorum, qui, nescio quâ animi levitate, inanes quasdam fabulas contexunt, et ea extitisse affirmant, quæ nunquam extiterint; ea se vidisse, quæ nunquam viderint; ea dixisse, quæ nunquam dixerint. Hæc plerumque stultitiâ correpti sunt ii, qui, longè peregrinati, eò plùs se mirandos fore putant, quò plùs miranda affirmant; et ex incredilibus sibi fidem volunt adstruere. Ii verò, quos in exteris regiones impulit aut amor novitatis, aut lucricupido, nequaquam soli sunt, qui hanc mentiendi facultatem sibi vindicant. Plurimi sunt, domi enutriti, qui à focis et Laribus suis nunquam

quam emigrârunt, quibus in hoc genere facilè primæ concedendæ sunt; nec futilia hæc mendacia ubivis uberius florere credo, quàm inter colloquia, et commercia urbanorum et festivorum hominum, quibus nihil aliud est negotii, quam novum aliquod mendacium fingendo, sermonem elanguescentem resuscitare.

X. Sciant autem mendaces, quâcunque de causâ à vero se abstrahant, Deo Optimo Maximo, qui ipse est verissimus, ingratissimum esse mendacium; nec leve fore eorum supplicium, qui aliud dixerint, aliud fecerint. Sciant insuper, se hominibus invisos et contemptos esse: quis enim bonorum omnium justiore indignatione excipitur, quàm ille, cujus ex ore mendacia adeò profluunt, ut nulla ei fides adhibenda sit; quique tot machinatur, tot comminiscitur, ut cum eo vel colloqui periculosissimum sit?

De Officiis Christiani Hominis erga Scipsum.

C A P. XV.

De subjugandis Corporis Libidinibus.

I. *Affectuum impetu juvenes corripit.* II. *Fallere se homines in hoc vitio.* III, IV. *Contra adulterium,* V. *et omnia libidinis genera.* VI. *Scorti descriptio, ex Solomonis proverbiiis sumpta.* VII. *Mala in hac vitâ libidinosos sequi.* VIII. *A cogitatis impuris abstinendum,* IX. *et verbis.* X. *ad finem. Quæ ad vitandum hoc scelus præcipuè spectent.*

I. **D**E reprimendis voluptatibus, et libidinibus subjugandis, pauca ut dicam, necesse habeo: eo enim affectuum impetu juvenes sæpissimè corripuntur, ut priùs in mala præcipientes corruant, quàm rationi, frustrâ reclamanti, auscultent.

II. Scio in hoc vitio plurimos se fallere solitos, vanis, speciosisque argumentis, quibus fidem adstruunt animi præjudicatæ libidines.

‘Cur enim,’ inquiunt, ‘cupiditates, appetitusque menti humanæ inseruit Deus, quibus indulgere non licitum?’ * *Cur legem in membris habemus, præliantem contra legem animarum, nosque ultrò in peccata trahentem?* Cur visâ pulchritudine corripuntur oculi, incenduntur affectus, si motibus istis obsequi nefas?’ Quibus respondeo, ‘In tentatione exsuperandâ spectari hominum erga Deum obedientiam; nec posse bonos fieri, si et malis esse non liceat.’ Respondeo insuper, ‘Rationem homini à Deo datam esse, quæ motus animi, extra terminum vagantes, comprimeret; quæ ab excogitatâ nequitia eum revocaret; quæ affectibus imperaret.’ Respondeo denique, ‘Christiani hominis officio ea omnia repugnare, quæ à Christo vetantur.’ † *An nescitis corpora vestra Christi esse membra? an igitur faciam, ut Christi membra fiant membra meretricis? Vetet Deus.*

III. Huic officio præcipuè, et præ aliis adversatur, cui cum uxore alienâ commercium est illicitum. Non enim simplici peccato laborat; nec solum contra illas leges peccat, quæ à Christo de castimoniâ latæ sunt; non solum ea omnia violat, quæ de matrimonii sanctissimo fœdere idem præcepit: sed huma-

* Rom. vii. 13.

† 1 Cor. vi. 15.

98 *De Officiis Christiani Hom. erga Seipsum.*

næ societatis vincula omnia perrumpit, ipsamque justitiam penitus subvertit. Si enim injustus sit ille, qui in possessiones alienas invadit, quâ pœnâ dignus est is, qui id, quod charissimum est, alii eripit, injuriamque infert, neque divitiis, neque gratiâ, neque ipsâ denique pœnitentiâ, reparandam.

IV. Piget profectò enarrare, quot ex hoc scelere mala exoriantur. Non certi liberi, non certi parentes; omnia promiscua, et tumultuosa; nec inter omnia peccata majus esse existimo, quo tollitur simul et humanæ societatis fides, et erga Deum reverentia! * *Adulteros enim judicabit Deus.* Et licet Judaicâ lege provisum est, ut fur † quadruplum restitueret, nulla ab adultero exigenda erat restitutio, quin funditus periret. Et scœdissimo huic flagitio aded se inimicissimum declaravit Christus, ut dixerit, ‡ *Quicumque ita aspicit fœminam, ut eam concupiscat, jam cum eâ in corde suo commisit adulterium.*

V. Nec levè delictum illorum est, qui membra sua quovis modo libidinibus addicunt, corpusque, animi immortalis capax, scœdè prostituunt. Impuris manibus aram adire, etiam apud Paganos nefas erat; impuris oculis Deum aspicere, nemini datum.

* Heb. xiii. 14. † Lev. xx. 10. ‡ S. Mat. v. 28.

VI. Non

VI. Non hîc pigebit verba proferre, ex omnibus hominibus, quotquot unquam extiterunt, sapientissimi. * *De fenestrâ in viam despexi; ibi vidi juvenem, consilii expertem, sub vesperum, nocte jam adventante. Et ecce! occurrit ei mulier, vestitu molli; statimque amplexa, 'Age,' inquit, 'tibi lectum stravi; tibi tapetibus, tibi operibus textilibus, tibi bysso ex Ægypto decoravi: tibi myrrhâ, balsamo, thure, suffrui. Age, usque ad delicias amore dissolvamur ad novam lucem.' Ecce illam insequitur, velut ad cædem bos, aut ad patibulum stultus. Festinat, ut volucris ad laqueum, nec scit vitæ suæ instare periculum, donec secur transfigat sagitta. Audite itaque, ô juvenes, et loquentis verba accipite; ne corda vestra in illam propensa sint, neve in viis ejus errate; multos enim vulneratos dejecit; imo ab eâ multi fortes confossi sunt: domus ejus est semita ad orcum; perque eam itur ad mortis penetralia.*

VII. Quid verò ea mala memorem quæ etiam in hâc vitâ illos comitantur, qui, de quo loquor, scelere, inquinant se, atque contaminant? Hinc morbi impurissimi; carnis, atque ossium putredo scedissima; dolores acerrimi; juvenus inhonorata; senectus præmatura; hinc sæpe in medio sceleris cursu festinata

* Prov. vii. 6, &c.

mors, inter virorum risus effusissimos, foeminarumque dignissimum odium, atque contemptum.

VIII. Nec verò à factis solum impuris abstinendum est, sed à cogitatis etiam. Ne in mentem aliquando se intrudent ea, de quibus nefas est meditari, nemo fere est qui prohibeat; sed cum ultero ea arcessimus, eum fovemus, cum amplectimur, cum his libenter immoramur, tum denique excogitata scelera nobis imputantur, et factorum crimen habent.

IX. Linguam quoque coercere, neque aliquid ex ore nostro projicere, quod non purum, et castum sit, id demum cujusque est officium. Contra bonos mores peccat, qui turpia dictu blaterat; nec minus Christi praeceptis repugnat, qui linguae frenum injicere suos jussit, dixitque, *Ex abundantia cordis os loqui.*

X. Pauca quaedam subicere non alienum erit, quae ad vitandum hoc scelus spectare praecipue arbitror.

XI. Primum itaque, mali principis obsecutus; primos libidinis motus, utpote et viris, et Christianis indignos, ex animis libera indignatione projiciamus. Si semel visio lucum

• S. Matr. xii. 34.

demus,

De subjugandis Corporis Libidimbus. 101

demus, furtim nobis irrepit, et magis magisque incautis affluit, donec paulatim omnia sibi subjecerit, et ex animo rationem penitus expulerit.

XII. Cavendum est insuper, ne mentes otio, atque ignavia, torpere sinamus. Agra inculto filix innascitur, et animo desidioso vindices agit scelus. At verò vel studiis occupato, vel lusu aliquo innocuo, pravae libidines obrepere non possunt.

XIII. Nec fas præterita scelera cum voluptate recordari: qui ita facit, virtutis se contemptorem planè ostendit, atque idem peccatum centies peccat.

XIV. Abstinendum etiam ab iis, qui nihil serium, aut sublime, sapientes, levi, atque obsceno sermone, sopitos affectuum æstus resuscitare conantur, omnesque, quibuscum versantur, in scelèris sui societatem allicere.

XV. Orandum est denique, ut Deus Optimus Maximus opem suam, atque gratiam omnibus temporibus elargiatur, præsertim cum eâ nobis plurimum opus sit. Ea unica est, quæ aut induci nos in tentationem prohibeat, aut inductos à malo liberet.

C A P. XVI.

De Intemperantiâ in Cibo et Potu.

I. Abutuntur intemperantes Dei donis. II. Frequentior in potu quàm in cibo intemperantia. III. Tria argumenta, quæ homines ab intemperantiâ deterreoant. IV. 1. Ebrietatem rationem è mente expellere. V. 2. Morborum et mortis immaturæ causam esse. VI. 3. A Christo veritam esse.

I. **U**T cæteris Dei donis, ita illis, quæ ad vitam sustinendam data sunt, abutimur. Cum necesse erat, ut corpora nostra, labore trita, et imminuta, cibo reficerentur; non terram sterilem, et infructuosam nobis dedit rerum omnium creator; sed agros frugibus, mare piscibus, aliis aëra complevit, quæ omnia hominum usui inservirent, et languentes, exhaustosque recrearent. Quid autem? an ea tantum quærimus, quæ natura exposcit? nonne inamarescunt epulæ saluberrimæ, nisi exquisitissimè conditæ? nonne heluones videmus usque ad fastidium sercula varia devorantes, seque cibo, ut ita dicam, ingurgitantes? Hoc qui facit, quid aliud agit, nisi optimis Dei donis abutitur; quæque in salutem

salutem suam data sunt, ea ipse in perniciem convertit ?

II. Hoc verò vitium, cibi scilicet intemperantia, nec tam frequens, nec tam periculosum est, quàm bibendi furor iste, unde ebrietas oritur. Inest, ut aliqui putant, jucunditas quædam in comessantium convivii, nec unquam tam felices sunt, quàm exutâ ratione. Cantare, exclamare, furere, bacchari, id profectò inter eos sapere existimatur; quasi quò propius ad bestias accedant, eò et feliciores et sapientiores sint.

III. Tria sunt, quæ breviter attingam, quibus ab hoc vitio vos deterream.

1. Ebrietatem paulatim rationem è mente expellere, atque adeò scelerum omnium esse originem.

2. Morborum plurimorum, et mortis immaturæ causam esse.

3. A Christo vetitam esse.

IV. 1. Ebrietatem è mente rationem expellere, ebrios modò viderit, nemo est qui dubitet. At non hoc solum inter pocula, atque in ipsis conviviiis fit; quicumque enim hoc vitium sibi frequenter indulget, animum hebetat, ingenium obrundit, auræque divinam istam particulam humi adfigit. Ratione expulsa, sensuque religionis amoto, quæ immanitas, quæ feritas, quæ dementia non illico exoritur ?

exoritur? Hinc jurgia, vulnera, homicidia; hinc profectò malorum genus omne enatum est. Qui, quicquid sacrum est, inter pocula contemnere, Deoque ipsi maledicere, elati, et magnifici animi esse credit; vereor ut et sobrius, si modò sobrius unquam sit, sceleris eum sui poeniteat. Nec si quid legibus contrarium ebrius commiserit, si hominem, (id quod sæpe accidit), aut vulneraverit, aut occiderit, satis est dixisse, 'Imprudens peccavi, nec quid egerim, scivi;' rapitur in poenam et supplicium; nec immeritò; qui unum scelus diluere credat, fatendo se alii deditum.

V. 2. Nec argumentis opus est, ut ebrietatem morborum plurimorum, atque adeò mortis immaturæ causam esse, probem. Circumspicite genus humanum; videte eos, qui cibo ad famem, potu ad sitim propellendam usi sunt; qui nihil immoderatum, nihil intemperatum cupientes, epulas suas non voluptate, sed desiderio naturali finierunt. Valent corpora; vigent artus; vires solidæ, et integræ sunt; et si (quod ferè accidit) ad senectutem accedant, mala tamen senectutis nec plorant, nec sentiunt. Utque corpora, ita et animi, firmi, et robusti, sunt; præscripta ad munia vegeti surgunt; somnoque fruuntur puro, nec interrupto. Qui verò natos sed ad
nihil

nihil aliud præter edendum et potandum credunt, quo cruciatu non vexantur? quibus morbis non laborant? Quam plurimos videmus, ipso in juvenutis flore, quasi ægram et languidam senectutem trancentes! Si quæ a dolore vacat hora, eam convivii impendunt; a convivii remoti, dolore iterum excruciantur. Brevem vitam miserime trahunt, mortem propinquam modo execrantes, modo timentes; quam cum diutius differre non licet, horrore correpti moriuntur, invisi et contempti ab ipsis sceleris sui sociis, qui tamen cito sequentur, spectaculum idem triste exhibituri.

VI. 3. Jam verò intemperantiam hanc à Christo vetitam esse, nemo est, qui dubitet, qui modo sacris litteris vel minime sit imbutus. Servus ille malus cui cum hypocritis assignatur locus, *inter fletus, dentiumque fridorem, verberare conserdos suos dicitur, quæritiam edere, et bibere, cum ebriis.* † Ephesios hortatur Paulus, *Ne vino inebrientur:* quin et ebrietatem inter pessima enumerat, † *invidiam, eadem, comestiones, et his similia.*

VII. Cavendum itaque, præcipuè in juvenute, ut ab hoc vitio quam procul abstinemus. Ad sitim satiandam data sunt poculenta, et ad corpus recreandum; quicquid

* Matt. xxiv. 48, &c. † Eph. v. 18. † Gal. v. 21.

ultrà est, id profectò scelus est. Multi sibi licere credunt, festis quibusdam diebus, ultra præscriptos fines paulò evagari; at quàm turpissimum est, non posse lætari, nisi exutâ ratione. Alii dicunt, se, licet aliquando liberiorè epulentur, nunquam virtuti, aut rationi adversari: At periculosissimum est præcipitio inambulare, unde si decidas, casus erit gravissimus. Fabulosis illis Circes poculis similia sunt vina, quæ si semel cupidè gustes, vix fieri possit, quin illis te proluas. Hujusce igitur vitii principis obstes; crescit enim in dies amor iste, et intemperata bibendi libido, donec sordeant omnia, et nauseam pariant, quæ non vino condiantur.

VIII. Utque ab hoc, ita profectò ab omni scelere, in ipso limine abstinendum est. Hactenus se, nec longius evagaturum, quis est, qui sibi promittat? Nemo fuit repentè turpissimus; à scelere ad scelus itur; nec tutum se esse aliquis confidat, qui à virtutis viâ vel minimè declinaverit. Omnis enim ab istâ aberratio, plena fraudis est, plena periculi.

F I N I S.